

國學基本圖  
叢書簡編  
繪寶鑑







夏文彥著

國學基本  
叢書簡編

圖

繪

寶

鑑

商務印書館發行

中華民國二十五年二月初版  
中華民國二十七年六月四版

(76230)

國學基本叢書簡編  
圖繪寶鑑 一冊

每冊實價國幣叁角伍分

外埠酌加運費滙費

著 者

夏

文

彥

發 行 人

王

雲

五

長沙南正路

印 刷 所

商

務

印

書

館

長沙南正路

發 行 所

商

務

印

書

館

各埠



# 楊序

雲間義門夏氏士良集歷代能畫姓名由史皇封膜而下訖于有元凡若干人釐爲五卷題曰圖繪寶鑑介其友天台陶君九成持其編謂余曰鄧椿有言其爲人也多文雖有不曉畫者寡矣其爲人也無文雖有曉畫者寡矣先生名能文賜一言標其端余曰書盛於晉畫盛於唐宋書與畫一耳士大夫工畫者必工書其畫法卽書法所在然則畫豈可以庸妄人得之乎宣和中建五岳觀大集天下畫史如進士科下題掄選應詔者至數百人然多不稱上旨則知畫之積習雖有譜格而神妙之品出於天質者殆不可以譜格而得也故畫品優劣關於人品之高下無論侯王貴戚軒冕山林道釋女婦苟有天質超凡入聖卽可冠當代而名後世矣其不然者或事模擬雖入譜格而自家所得於心傳意領者則蔑矣故論畫之高下者有傳形有傳神傳神者氣韻生動是也如畫猫者張壁而絕鼠大士者渡海而滅風翊聖眞武者叩之而響應寫人眞者卽能得其精神若此者豈非氣韻生動機奪造化者乎吾顧未知寶鑑中事模擬而得名士良亦能辨之否乎雖然梁武作歷代畫評米芾作續評非神識高者不能士良好古嗜學風情高簡自其先公愛閒處士以來家藏諸書名畫爲最多朝披夕覽有得於中且精繪事是編之作足以知其品藻者矣視蕭米芾未足多讓也是爲序士良名文彥其先爲吳興人云會稽抱遺老人楊維禎在雲間草玄閣書

# 自序

余性鄙僻。六藝之外。他無所好。獨嘗嗜畫。遇所適。輒終日諦玩。殆忘寢食。然猶病其不博。稍取歷代畫史。考論其世。與夫得失優劣之差。以廣未至。而卷帙浩繁。不能徧舉。欲輯爲一書。未暇也。自卜居泗上。人事稀闊。間以宣和畫譜附之。他書益以南渡遼金國朝人品。刊其叢勝。補其闕略。彙而成編。分爲五卷。名曰圖繪寶鑑。顧所撫雖詳。而尙慮遺者不少。益其未備。竭其精誠。俾千載之下。莫逃乎賞鑑。豈無博雅君子。與我同志者歟。至正乙巳秋七月甲子。吳興夏文彥士良書於寶墨齋。



## 續編滕序

繪畫之事。其來尚矣。曰寶鑑者。則元夏文彥氏所著也。蓋畫始盛於唐。大盛於宋。雖胡元之世。亦多有其人焉。其在唐時。則有若張彥遠氏著歷代名畫記。自軒轅至會昌。凡三百七十餘人。其在宋時。則有若郭若虛著圖畫見聞志。自會昌至熙寧。凡二百七十四人。有若鄧椿著畫繼。則自熙寧至乾道。凡百一十九人。有若陳德輝著續畫記。則自高宗訖宋終。凡百五十一人。其在勝國時。有若湯屋之畫鑒。而實大備於寶鑒。蓋哀集諸志。記見聞而成編。故自軒轅以至宋。又自宋以至元。凡一千五百餘人。嗚呼。可謂勤矣。然夷考文彥。則博雅多識。精於畫藝。又世藏名跡。玩索有得。非徒知而好之者也。肆國朝承平百五十年。才藝之士。四方輩出。顧未有嗣志記。以追配古作者。豈非遺乎。錦衣苗公益之。嗜古好文。富藏名蹟。慨寶鑒之舛落。痛今賢之亡傳。乃取自國初。以至今日。能畫者若干人。彙爲一卷。以續夏氏之編。爰命工重刊。總爲六卷。嗚呼。甚盛心哉。編旣成。乃假予敍之。余鄙陋。非知畫者。竊好焉。間求所謂寶鑑考之。則皆漫滅。不可讀恨矣。乃今獲覩巽齋公盛舉。豈非一大快哉。舉殘墜躋時哲。尙友論世。於斯在矣。可以一藝小之耶。苗公名增。字益之。泌陽縣人。今官錦衣衛都指揮。巽齋其別號云。賜進士出身。奉直大夫。司經局太子洗馬。兼翰林院編修。經筵講官。同修國史。建安滕霄書。

## 續編自序

賓山吳子仁手錄時人能畫者十數。謁予告曰：錦衣苗公巽齋雅好圖畫。以元人夏士良圖繪寶鑑考其收積之真贋。厭其舊本模糊。命麒繕寫重刊。及纂當代名士以繼夏氏之編。奈麒因京闈考士。召書試錄所占。望先生代麒彙次。以爲續纂。予一時應之。深愧素無賞鑑。恐負賓山之托。遂以平日所聞所見及家藏之圖。撫拾以應。復謀諸社友錦衣王春泉。益其知見者。統書之。皆馳聲於士林者。不敢妄分優劣。以爲取舍。恐得罪於世。大抵書之者。略能記其出處姓名。至若有號有字。而不詳其出處姓名者。如雪谷及東川居士之竹。西園逸史之草蟲。松雪之人物。巖東之魚。東山一菴之山水。雖皆清麗出人意表。不敢列於集中。又若朽菴與賓山。皆有水墨山水小景。予皆收之。其筆力之佳。由其善書故也。噫。國家重熙累洽。於茲百五十年餘矣。公卿名士山林道釋所作之畫。名當時而傳後世者。不知幾多。予之庸見。不過如此。尙賴後之君子。幸爲正其敍列。增其遺略。以成巽齋之美焉。正德己卯中秋日。欽天監副玉泉韓昂識。



# 圖繪寶鑑

## 總目

### 卷一

六法三品

三病

六要

六長

製作楷模

一

古今優劣

粉本

賞鑒

裝褫書畫定式

敘歷代能畫人名

七

### 卷二

吳

晉

宋

梁

陳

隋

唐

五代

### 卷三

宋

三二

### 卷四

宋南渡後

金

六八

### 卷五

元

外國

九六

### 補遺

一一〇

圖繪寶鑑 總目

二

宋

齊

梁

後魏

唐

五代

宋

遼

元

續編

明

續補

五代

宋

金

一二八

一一八



# 圖繪寶鑑

## 卷一

### 六法三品

謝赫云。畫有六法。一曰氣韻生動。二曰骨法用筆。三曰應物寫形。四曰隨類傅彩。五曰經營位置。六曰傳模移寫。六法精論。萬古不移。自骨法用筆以下五法。可學而能。如其氣韻。必在生知。固不可以巧密得。復不可以歲月到。默契神會。不知然而然也。故氣韻生動。出於天成。人莫窺其巧者。謂之神品。筆墨超絕。傅染得宜。意趣有餘者。謂之妙品。得其形似而不失規矩者。謂之能品。

### 三病

畫有三病。皆繫用筆。一曰板。二曰刻。三曰結。板者腕弱筆癡。全虧取與。物狀平褊。不能圓混也。刻者連筆中疑。心手相戾。勾畫之際。妄生圭角也。結者欲行不行。當散不散。似物凝礙。不能流暢也。

### 六要

氣韻兼力。一也。格制俱老。二也。變異合理。三也。彩繪有澤。四也。去來自然。五也。師學捨短。六也。

### 六長

麓鹵求筆。一也。僻澀求才。二也。細巧求力。三也。狂怪求理。四也。無墨求染。五也。平畫求長。六也。

### 製作楷模

釋像有善巧苗本作功方便之顏道流具脩真度世之範帝王崇天日龍鳳之表外夷有慕華欽順之情  
儒賢見忠信禮義之風武士多勇悍英烈之貌隱逸識高世之節貴戚尙侈靡之容天帝明威福嚴重之  
儀鬼神作醜醜原注尺者切馳趙原注于鬼切之狀仕女宜秀色嬌原注烏果切媚原注奴坐切之態田  
家有醇叱朴野之真畫衣紋林石用筆全類於書衣紋有重大而調暢者有縝細而勁健者勾綽縱掣理  
無妄下以狀高側深斜卷摺飄舉之勢林木有椽枝挺榦屈節皴皮紐裂多端分敷萬狀山石多作礮頭  
亦爲稜面要見幽遠而氣雄崢嶸而秀潤畜獸須備筋力精神毛骨隱起魚龍求游泳之妙升降之宜觀  
畫水湯湯若動使人有浩然江湖之思屋木折算無虧筆墨均壯深遠透空花竹有四時景候陰陽向背  
筍條老嫩苞萼後先自然豔麗閒雅園蔬野草咸有出土體性禽鳥尙毛羽翔舉飛集之形知此雖不能  
盡鑒閱之精妙然工拙亦略可見矣或有逸品皆高人勝士寄興寓意者當求之筆墨之外方爲得法

古今優劣

佛道人物士女牛馬近不及古山水林石花竹禽魚古不及近何以明之且顧愷之陸探微張僧繇吳道  
元及閻立德立本皆純重雅正性出天然吳生之作爲萬世法號曰畫聖張萱周昉韓幹戴嵩氣韻骨法  
皆出意表後之學者終莫能到故曰近不及古至如李成關仝范寬董源之迹徐熙黃筌居采之蹤前不  
藉師資後無復繼踵借使二李三王之輩復起邊鸞陳庶之倫再生亦將何以措手於其間哉故曰古不  
及近

粉本

古人畫藁謂之粉本。前輩多寶蓄之。蓋其草草不經意處。有自然之妙。宣和紹興所藏粉本。多有神妙者。賞鑒

看畫如看美人。其風神骨相。有肌體之外者。今人看古蹟。必先求形似。次及傳染。次及事實。殊非賞鑒之法也。米元章謂好事家與賞鑒家。自是兩等。家多資明。別本作奇力。貪名好勝。遇物收置。不過聽聲。此爲好事。若賞鑒則天資高明。多閱傳錄。或自能畫。或深畫意。每得一圖。終日寶玩。如對古人。雖聲色之奉不能奪也。看畫之法。不可一途。而取古人命意立迹。各有其道。豈拘以所見繩律古人之意哉。鐙下不可看畫。醉餘酒邊亦不可看畫。卷舒不得其法。最爲害物。

唐人五代絹素麗厚。宋絹輕細。望而可別。唐宋也。

古人畫墨色俱入絹縷。精神迥出。僞者雖極力仿倣。而粉墨皆浮於縑素之上。神氣亦索然。蓋古人筆法圓熟。用意精到。初若率易。愈玩愈佳。今人雖極工緻。一覽而意盡矣。

御題畫真僞相雜。往往有當時名手臨摹之作。故祕府所藏臨摹本。皆題爲真。邇惟明昌所題最多。具眼者自能別識也。

### 裝褙書畫定式

大整幅。上引首三寸。下引首二寸。

小全幅。上引首二寸七分。下引首一寸九分。經帶四分。上標除打撇竹外。淨一尺六寸五分。下標除上軸外。淨七寸。

一幅半。上引首三寸六分。下引首二寸六分。經帶八分。

雙幅。上引首四寸。下引首二寸七分。上標除打撇竹外。淨一尺六寸八分。下標除上軸桿外。淨七寸三分。

兩幅半。上引首四寸二分。下引首二寸九分。經帶一寸二分。

三幅。上引首四寸四分。下引首三寸一分。經帶一寸三分。

四幅。上引首四寸八分。下引首三寸三分。經帶一寸五分。

橫卷標合長一尺三寸。高者用全幅。引首闊四寸五分。原注高者五寸。

古畫不脫不須背標。蓋人物精神髮彩。花之穠豔蜂蝶。只在約略濃淡之間。一經背多。或失之也。故紹興裝褫古畫。不許重洗。亦不許裁剪過多。

古厚紙不得揭薄。若紙去其半。則書畫精神。一如摹本矣。

檀香辟濕氣。畫必用檀軸。有益。開匣有香。而無糊氣。又辟蠹也。

敘歷代能畫人名

軒轅時

史皇

周

封膜

齊



敬君

秦

裂裔

前漢

毛延壽

陳敞

劉白

龔寬

陽望

樊育

後漢

趙岐

劉褒

蔡邕

張衡

劉旦

楊魯

魏

曹髦

楊脩

桓範

徐邈

吳

吳王趙夫人

蜀

諸葛亮子瞻

晉

明帝

荀勗

張墨

王廙

王羲之

王獻之

康昕

溫嶠

謝岩

夏侯瞻

嵇康

曹龍

丁遠

楊惠

江思遠

王濛

戴逵子勃勃子願

宋

顧寶光 宗炳 王微 謝莊 袁倩倩子質 史敬文 史藝 劉斌 尹長生 顧駿

康允之 顧景秀 吳暕 張則 劉胤祖弟紹祖子璞 蔡斌 濮萬年弟道興 史粲

宋僧辯 褚靈石 范惟質

南齊

宗測 劉係宗 姚曇度子釋惠覺 遵道愍勞沙門僧珍 章繼伯 范懷珍 鍾宗之 王奴

王殿 戴蜀 陳公恩 陶景真 張季和 沈標 謝恭 沈粲 丁光 周曇研

謝惠連 謝約 虞堅 丁寬 劉瑱 毛惠遠弟惠秀子稜

梁

元帝子方等 蕭大連 蕭賁 陸杲 陶弘景 袁昂 焦寶願 嵇寶鈞 聶松 解倩

陸整 江僧寶 僧威公 僧吉底俱 僧摩羅菩提 僧迦佛佗

後魏

蔣少遊 郭善明 侯文和 柳儉 閔文和 郭道興 楊乞德 王由 祖斑苗本作班

北齊

高孝珩 蕭放 楊子華 田僧亮 劉殺鬼 曹仲達 殷英童 高尙士 徐德祖 曹仲璞

後周

馮提卿

隋

閻毗 何稠 劉龍弟袁楊契丹 劉烏 陳善見 江志 李雅 王仲舒 閻思光

解悰 程瓚 僧曇摩掘人

唐

楊須跋 趙武端 范龍樹 周烏孫 楊德紹 寶弘果 毛婆羅 孫仁貴 金忠義 竺元標

蔡金剛 毛嵩 姚彥山 程遜 董好子 楊樹兒 耿純 任貞亮 暢整 李相國

陳懋 劉智敏 史晟 何君墨 京元成 崔霞 冷元琇 馬光業 李蠻子 馬樹鷹

祝丘 潘細衣 周子敬 段去惑 杜景祥 王允之 崔陽元 李炅 張惟巨 李滔

張通 巖杲 耿昌弟昌期楊德本 貝俊 李韶 魏晉孫 劉之章

右歷代能畫人名姓而跡罕傳於世故不詳載見張彥遠名畫記

卷二

吳

曹弗興吳興人以畫名冠絕一時孫權命畫屏誤墨成蠅狀權疑其真以手彈之時吳有八絕弗興預一焉又嘗見溪中赤龍寫以獻孫皓至宋文帝旱曠苗本作噴取弗興龍置水傍應時雨足且南齊去宋

未遠。而謝恭謂弗興之跡。殆不復見。祕閣之內。獨有所畫龍頭。又况後南齊數百歲耶。嘗畫兵符圖。極工。然不見諸傳記者。豈非一時秘而不出。故得以傳遠。不坐豐狐文豹之厄也。

晉

衛協以畫名於時。作道釋人物。冠絕當代。世以協爲畫聖。顧愷之以丹青自名。獨慎許可。亦謂七佛與烈女圖。偉而有情勢。毛詩北風圖。巧密於情思。而自以所畫爲不及。

顧愷之字長康。小字虎頭。晉陵無錫人。義熙中爲散騎常侍。愷之博學有才氣。丹青亦造其妙。筆法如春蠶吐絲。初見甚平易。且形似時。或有失細視之。六法兼備。傅染以濃色。微加點綴。不求暈飾。故俗傳謂之三絕。畫絕。擬絕。才絕。方時爲謝安知名。以謂自生民以來未之有也。世以謂愷之天材挺出。獨立無偶。妙造精微。雖荀衛曹張。未足以方駕也。

史道碩不知何許人。兄弟四人。皆以善畫得名。而道碩尤工人馬及鵝等。初與王微並師荀勗。衛協。伎能上下。二人優劣未判。而謝恭謂王得其意。史得其似。若是則微之所得者神。碩之所寫者形耳。意與神超出乎丹青之表。形與似未離乎筆墨蹊逕。宜用此辨之。

謝雉陳郡陽夏人也。初爲晉司徒主簿。入宋爲寧朔將軍。善畫。多爲賢母孝子節婦烈女之圖。有補於風教。雖舐筆和墨。不無意也。

宋

陸探微吳人。善畫。事明帝。人謂畫有六法。探微得法爲備。平生多愛圖古聖賢像。二子綏洪綏肅。作畫亦



工惜不見傳。唐張彥遠謂體運逾舉，風力頓挫，一點一拂，動筆新奇，固自不凡矣。

梁

張僧繇，吳人。天監中，歷官至右將軍、吳興太守。以丹青馳譽於時，世謂僧繇畫骨氣奇偉，規模宏逸，而六法精備，當與顧陸並馳爭先。僧繇畫釋氏爲多，蓋武帝時崇尚釋氏，故僧繇之畫，往往從一時之好。

陳

顧野王，字希馮，吳郡人。七歲讀五經，九歲能屬文，善圖畫。嘗畫古賢王褒書贊，時稱二絕。尤工畫草蟲，官至黃門侍郎。

隋

展子虔，歷北齊周至隋爲朝散大夫。而所畫臺閣，雖一時如董展，不得以窺其妙。寫江山遠近之勢，尤工。故咫尺有千里趣。

董展，字伯仁，汝南人。以才藝稱鄉里，號爲智海。官至光祿大夫，殿內將軍，尤長於畫。雖無祖述，不愧前賢。夙德名流，見者失色。與展子虔齊名，曾作道經變相，爲時所稱。自非畫外有情，參靈酌妙，入華胥之夢，與化人同遊，何以臻此。

鄭法士，不知何許人。在周爲大都督員外侍郎，建中將軍。入隋授中散大夫，畫師僧繇尤長於人物，論者謂江左自僧繇以降，法士獨步焉。弟法輪，子德文，孫尙子，皆傳家學。尙子睦州建德尉，尤工鬼神，又善爲顫筆，見於衣服手足木葉川流者，皆勢若顫動。

唐

閻立德歷官工部尚書。父毗。在隋以丹青得名。與弟立本家學俱造其妙。

閻立本總章元年以司平太常伯拜右相。有文學。尤善應務。與兄立德以善畫齊名。嘗寫秦府十八學士

凌烟閣功臣等。悉皆輝映前古。時人咸稱其妙。

張孝師爲驃騎尉。善畫。嘗死而後生。故畫地獄。相爲尤工。吳道玄見之。因效爲地獄變相。

范長壽不知何許人也。學張僧繇畫。然能知風俗好尚。作田家景候人物。皆極其情。至於山川形勢。屈曲

向背。分布遠近。各有條理。人謂可以企及僧繇也。當時得名甚著。官止司徒苗本作人校尉。

何長壽與范長壽同師法。故苗本作固。所畫多相類。然一原而異派。論者次之。

尉遲乙僧吐火羅人。貞觀初其國以善畫薦中都。授宿衛官。封郡公。其父跋質那。時人呼爲大尉遲。乙僧

爲小尉遲。父子皆擅丹青。其用筆之妙。遂與閻立本爲之上下也。

吳道玄字道子。陽翟人。舊名道子。少貧。游洛陽。學書於張顛。賀知章不成。因工畫。深造妙處。若悟之於性。

非積習所能致。初爲兗州瑕丘尉。明皇聞之。命入供奉。更今名。以道子爲字。由此名震天下。其筆法超

妙。爲百代畫聖。早年行筆差細。中年行筆磊落。如蓴菜條。人物有八面生意。活動。其傳采於焦墨痕中。

略施微染。自然超出縑素。世謂之吳裝。或謂張僧繇後身。信不誣也。供奉時爲內教博士。非有詔不得

畫。官止寧王友。

翟琰。早師吳道玄。每道玄畫落墨已。卽去。多命琰布色。而道玄輒許可。故知琰自不凡。琰布色落墨。與道

玄真贗故未易辯也。

楊庭光與吳道子同時。善寫釋氏像。與經變相。旁工雜畫山水等。皆極其妙。時謂頗有吳生體。但行筆差細。以此不同。其畫佛像。多在山林中。

盧楞伽。長安人。學於吳道玄。但才力有所未及。尤喜作經變相。入蜀。名益著。雖一時名流。莫不斂衽。乾元初。於大聖慈寺。畫行道僧。顏真卿爲之題名。時號二絕。

趙公祐。成都人。工畫佛道鬼神。世稱高絕。太和間。已著畫名。李德裕鎮蜀。以賓禮遇之。改蒞浙西。辟從蓮

幙。原注本長安人。寶曆中寓居於蜀。

趙溫。其公祐之子。幼而穎秀。家學益工。筆法臻妙。

趙德齊。溫其之子。襲二世之精藝。奇蹤逸筆。爲時推許。光化中。詔許王建於成都。置生祠。命德齊畫西平王儀仗。及朝真殿上。畫后妃嬪御。皆極精妙。昭宗喜之。遷翰林待詔。

范瓊。不知何許人。寓居成都。與陳皓彭堅同時。俱以善畫人物得名。嘗作烏瑟摩像。設色未半。而罷。筆蹤超絕。後之名手。莫能補完。

常粲。長安人。咸通中路巖侍中。牧蜀日。粲入蜀。略賓禮之。善畫人物。喜爲上古衣冠。不墮近習。有伏羲畫卦。神農播種。陳元達鎖諫等圖。則亦詩人主文。而譎諫之義也。其子重胤。能世其學。尤善於寫貌。僖宗朝。爲翰林供奉。

孫位。東越人。僖宗幸蜀。位自京入蜀。自稱會稽山人。舉止疎野。襟韻曠達。喜飲酒。罕見其醉。樂與幽人爲

物外交。光啓中。畫應天寺壁。勢若飛動。後改名遇。卒不知所在。世稱龍水。尤位所長。原注德隅堂畫品。載位爲蜀文成殿下將軍。後遇異人。得度世法。故名遇云。

張南本。不知何許人。善畫人物。尤工畫火。中和年。寓止成都金華寺。畫八明王。時游僧升殿。見火勢逼人。驚惶幾仆。時論孫位之水。幾於道。南本之火。幾於神。

辛澄。不知何許人。多遊蜀中。工畫佛像。不聞其他。蓋專門之學也。

張素卿。簡州人。少孤貧。作道士。僖宗時。上表言丈人山在五岳上。不當稱公。詔可其請。因賜紫。嘗作十二真君像。各寫其賣卜貨丹書符導引之意。人稱其妙。

道士陳若愚。在蜀人師張素卿。得其筆法。

姚思元。林泉人。畫道釋。一時知名。作紫微二十四化。皆所以警悟世俗。非止遊戲丹青而自娛悅者。

楊寧。善畫人物。與楊昇。張萱同時。皆以寫真得名。開元間。寫史館像。風神氣骨。不止於求似。而畫至人物。爲難。楊寧獨工其難。而遂擅人物。專門之習。豈易得哉。

楊昇。不知何許人。嘗寫明皇與肅宗像。深得王者氣度。蓋昇以寫照專門。又當時親見奇表。宜乎傳之甚精。

張萱。京兆人。善畫人物。而於貴公子與閨房之秀。最工。其爲花蹊竹樹。苗本作樹。點綴皆極妍巧。尤長於寫嬰兒。其畫婦人。以朱暈耳根。以此爲別。

鄭虔。鄭州滎苗。本作滎。陽人。善畫山水。山饒墨。樹枝老硬。黃筌山水。有法虔者。好書。嘗自寫其詩。并畫獻。



明皇。明皇書其尾曰。鄭虔三絕。官止著作郎。

陳闕。會稽人。爲永王府長史。明皇召寫御容。妙絕當時。又嘗寫肅宗。不惟龍鳳之姿逼真。而筆英逸。真與闕立本并馳。交先。故一時人多從其學。韓幹亦以畫馬進。明皇怪其無闕筆法。使令師之。其器重可知也。

周古言。不知何許人。善畫人物。尤工婦人。多畫宮禁歲時行樂之勝。世稱名筆。然摹寫形似。未爲奇特。至於布景命意。則意在筆外。惟覽者得於丹青之所不到。則知非常工所能爲也。

周昉。字景元。一字仲朗。長安人。傳家闕。好屬文。窮丹青之妙。遊卿相間。貴公子也。善畫貴遊人物。作士女。多爲穠麗豐肥之態。蓋其所見然也。又善寫真。兼移其神氣。故無不歎其精妙。

王拙。太原人。官止劍州刺史。喜丹青之習。師周昉。然精密則視昉爲不及。一時如趙博文。皆昉高弟也。然拙過博文遠甚。

韓滉。字太冲。德宗朝宰相。當建中末。值茲喪亂。遂兼統六道。節制出爲鎮海軍。江浙東西兼荆湖洪鄂等道。節度使。中書令。晉國公。公退之暇。留意丹青。書師張顛。畫師陸探微。其畫人物牛馬極工。尤好圖田家風俗。嘗自言。不能定筆。不可論書畫。以非急務。故自晦。不傳於人。

杜庭睦。不知何許人。喜寫故實。畫明皇斫脰圖。人物品流。見之風神氣骨間。非有得於心。何以臻妙如此。吳旻。不知何許人。作林泉平遠。溪友釣徒。皆有幽致。鍾師紹。蜀人。妙丹青。畫道釋人物犬馬頗工。

尹繼昭不知何許人。工畫人物臺閣。冠絕當世。

胡瓌。范陽人。工畫番馬。鋪敘巧密。近類繁冗。而用筆清勁。至於穹廬什器射獵。形容備盡。凡畫橐駝及馬。以狼毫筆疏染。取其生意。亦善體物者也。後以筆法授子虔。

胡虔。瓌之子。世謂丹青之學有父風。

李思訓。唐宗室也。官至左武衛大將軍。畫皆超絕。尤工山水林泉。筆格遒勁。得湍瀨潺湲。烟霞縹渺。難寫之狀。用金碧輝映。爲一家法。後人所畫著色山。往往多宗之。然至妙處。不可到也。

李昭道。思訓之子。官至中書舍人。作畫稍變其父之勢。然智思筆力。視思訓爲未及。然其妙亦至矣。世稱思訓爲大李將軍。昭道爲小李將軍。

盧鴻。字浩然。范陽人。隱嵩少間。開元中以諫議大夫召。固辭。賜隱居服。草堂一所。令還山。頗喜寫山水。平遠之趣。其筆意位置。清氣襲人。

王維。字摩詰。開元初擢進士。官至尚書右丞。家於藍田輞川。善畫。尤精山水。觀其思致高遠。出於天性。初未見於丹青。時時詩篇中已苗。本有自字。有畫意。蓋其胸次瀟灑。落筆便與庸史不同。

王洽。不知何許人。能潑墨成畫。性嗜酒。多放敖於江湖間。每欲作圖。必沉醉之後。解衣襍礴。先以墨潑幀上。因其形似。或爲山石。或爲林泉。自然天成。不見墨汚之迹。蓋能脫去筆墨畦町。自成一種意度。原注

張彥遠有王默師項容。又師鄭虔。酒後用頭髻取墨抵絹上。作山水松石。唐名畫錄有王墨善潑墨山水。故謂之王墨。疑（明別本作恐）卽此王洽也。

項容不知何許人。當時以處士名稱之。善畫山水。師事王默。作松風泉石圖。筆法枯硬而少溫潤。故昔之評畫。譏其頑澀。然挺特嶮絕。亦自是一家。

張詢。成海人。不第後。流寓長安。以畫自適。後至蜀中。爲僧夢休作早午晚三景於壁間。謂之三時山。僖宗幸蜀。見之。歎賞。彌日。

畢宏不知何許人。善畫山水。作松石圖於左省壁間。一時文士有詩稱之。其落筆縱橫。變易常法。意在筆前。非繩墨所能制。故得生意爲多。

張璪。一作藻。字文通。吳郡人。官止檢校祠部員外郎。衣冠文行。爲一時名流。善畫山水松石。苗本作松石。

山水。自撰繪境一篇。言畫之要訣。畢庶子宏一見。驚異之。璪嘗手操雙管。一爲生枝。一爲枯枿。而四時之行。遂驅筆得之。所畫山水。高低秀絕。咫尺深重。幾若斷取。一時號爲神品。

荆浩。河內人。自號洪谷子。博雅好古。以山水專門。頗得趣向。善爲雲中山頂四面峻厚。自撰山水訣一卷。嘗語人曰。吳道子畫山水。有筆而無墨。項容有墨而無筆。吾當采二子所長。成一家之體。故關仝北面事之。世論荆浩山水。爲唐末之冠。

漢王元昌。唐高祖第七子。博學善畫。李嗣真謂天人之姿。博綜伎藝。頗得風韻。自然超舉。有畫鞍馬鷹鷂。傳於時。雖閻立德立本。不得以季孟其間。

江都王緒。唐霍王元軌之子。太宗姪也。能書畫。最長於鞍馬。以此得名。官至金州刺史。杜子美詩謂國初已來畫鞍馬。神妙獨數江都王。爲一時所重。

韋無忝京兆人與弟無縱俱以畫稱尤善畫馬及異獸官至左武衛大將軍

曹霸髦之後髦以畫稱於魏霸在開元中畫已得名天寶末詔寫御馬及功臣像筆墨沉著神采生動官至左武衛大將軍

裴寬絳州人以文辭進有能稱明皇時爲范陽節度使兼采訪使頗受眷知所畫小馬圖蕭散閒適筆墨典雅

韓幹長安人王維一見其畫遂推獎之天寶初入爲供奉時陳閱畫馬榮遇一時明皇令師之幹不奉詔曰臣自有師今陛下內廐馬皆臣師也明皇益奇之後師曹霸畫馬得骨肉停勻法傳染入縑素弟子孔榮頗得其法

韋鑿長安人善畫龍馬弟鑾工山水松石然傳於世者不多

韋偃父鑾官至少監善畫山水松石花鳥時名雖已籍籍而未免墮於古拙之習偃雖家學而筆力逾健風格高舉過父遠甚尤善畫馬其筆法磊落揮霍振動

趙博文尙書左丞相涓之子世業儒喜丹青而於士女兔犬爲尤工絕無世俗區區形似之習

戴嵩不知何許人初韓滉鎮浙西命爲巡官師滉畫皆不及獨於牛能盡野性過滉遠甚至於田家川原亦各臻其妙弟嶧亦以畫牛得名

戴嶧嵩之弟喜畫牛善作奔逸之狀

李漸不知何許人官任忻州刺史善畫番馬人物筆跡氣調當時號無儔



李仲和。漸之子。善畫番馬人物。有父遺風。但筆力有所不逮也。張符不知何許人。善畫牛。頗工筆法。有得於韓滉。亦韓之派也。

滕王元嬰。唐宗室也。善丹青。喜作蜂蝶。朱景元嘗見其粉本。謂能巧之外。曲盡情理。

薛稷。字嗣通。河東汾陰人。收之從子也。書學褚河南。畫蹤如閣立本。善花鳥人物。雜畫猶長於鶴。得名於

古今焉。稷在睿宗朝。官至太子少保。封晉國公。

邊鸞。長安人。以丹青馳譽於時。尤長於花鳥。得動植生意。大抵精於設色。如良工之無斧鑿痕耳。然以技困窮。卒不獲遇。轉徙潞澤間。米海岳論畫花。亦謂鸞畫如生。

于錫。不知何許人。善畫花鳥。最長於雞。

梁廣。不知何許人。善畫花鳥。爲一時所稱。故鄭谷海棠詩有梁廣丹青點筆遲之句。

蕭悅。不知何許人。官爲協律郎。喜畫竹。深得竹之生意。名擅當世。

刁光胤。長安人。天復中。避地入蜀。善畫湖石花竹。貓兔鳥雀之類。慎交游。所與者皆一時佳士。黃筌孔嵩

皆師事之。

周滉。不知何許人。善畫水石花竹禽鳥。頗臻其妙。

朱審。吳郡人。得山水之妙。亦畫人物竹木。

王宰。家於西蜀。貞元中。韋令公以客禮待之。畫山水樹石。出於象外。多畫蜀山。玲瓏窳窳。巉嵯苗本作差。

巧峭。

楊炎貞元中宰相出貶崖州嘗畫松石山水出於人表

程脩己其先冀州人祖大曆中任越中醫學博士時周昉任越州長史遂令脩己師事之盡得其畫人物

口授之妙尤精山水花竹

馮紹政善畫雞鶴龍水時稱其妙開元中爲少府監

張遵禮善畫鬪將鞍馬戈矛器械用筆塹差小畫尤佳

王紹宗琅琊人父修禮畫迹與殷仲相類

蒯廉性野嘗愛畫鶴後師於薛稷深得其妙

檀智敏時號檀生屋木樓臺出一代之製

鄭儔屋木樓臺師於檀生

陳譚工山水德宗除連州刺史令寫彼處山水之狀每歲貢獻野逸不羣高情邁俗張藻之亞也

劉商爲郎中性格高邁愛畫松石人物初師張藻後自造真爲意有觀奕圖石刻行於世

王定爲中書常僻名達按應作癖於畫公政之外每圖佛像高僧士女皆冠於當代貞觀以畫得名

黃諤畫馬獨善於時

李靈省落托不拘檢長愛畫山水每圖一障非其所欲不卽強爲也但以酒生思傲然自得不知王公之

尊貴自得其趣耳

張志和號煙波子嘗漁釣於洞庭湖顏魯公典吳興知其高節以漁歌五首贈之張乃隨句賦象人物舟

船煙波風月鳥獸皆依其文寫之曲盡其妙。

左全蜀人本儒家工畫佛道人物寶曆中聲馳宇內多做吳生頗得其要。

陳皓彭堅與范瓊同時同藝名振三川。

呂曉竹虔尹繼昭弟子並長安人工畫道釋人物僖宗朝翰林待詔廣明中扈從入蜀麻居禮蜀人師張南本光化天復間聲迹甚高。

李洪度成都人工畫道釋人物馳譽當時。

張騰不知何許人工道釋雜畫筆法布色頗窮其妙。

張贊何陽人工畫人物道釋。

王浹不知何許人善畫人物。

韓王元嘉善畫龍馬虎豹則天授太尉。

劉孝師靳智翼俱善畫。

梁寬吳智敏更爲俊逸。

王隴子善山水幽致峯巒極佳。

康薩隴爲振威校尉畫人馬措意極高。

王知愼工書畫師於閭與兄知敬齊名筆力爽利風采不凡。

王韶應一作韶隱畫鬼神深有氣韻一云善山水人馬。

李生。吳弟子。善畫地獄佛像。有類於吳而稍弱。張藏亦吳弟子。裁度麗快。思若湧泉。亦好細畫。

武靜藏。善畫鬼神。有氣韻。

董芎。字重照。開元中。多在尚方。善雜畫。車牛最推其妙。

陳靜心。善寺壁。弟靜眼。善地獄山水。

程雅。善雜畫。

楊坦。楊仙喬。並長安人。好圖鬼神。子爽亦善之。

解倩。善鬼神。

姜皎。上邽人。善鷹鳥。開元中。官至祕書監。

李思誨。林甫之父。思訓之弟。善丹青。贈禮部尚書。

李林甫。善山水。類昭道。

李湊。林甫姪。善畫綺羅人物。師閻令。但筆迹疎散。畫其媚態則盡美。

郎餘令。有才名。工山水古賢。爲著作佐郎。

曹元廓。則天時。爲朝散大夫。左尚方令。師於閻王。騎獵人馬山水。

劉行臣。善畫鬼神。類王朝隱。

暢譽。善山水。似李將軍。譽子瑾。妙過於父。

尹琳善畫佛像高宗時得名

李仲昌李嗣真並琳弟子

陸庭曜善人物鬼神有氣韻時稱第一

僧智瓊善山水鬼神氣韻洒落

殷令名陳郡人父不害累代工書畫

殷文禮字大端書畫妙過於父武德初爲中書舍人

殷仲容文苗本作聞禮子則天時任秘書丞善寫貌及花鳥妙得其真或用墨色如兼五采亦邊鸞之次

也

談皓善畫人物有態度衣裳潤媚與李湊小相類

僧金剛三藏師子國人善西域佛像

宋令文善書畫

司馬承禎字子微善畫又工篆隸

釋脩然俗姓裴氏善丹青工山水

鄭逾善山水天寶中得名於梁宋間

李果奴善寫人物筆迹調潤

張湮官至刑部員外郎善畫山水



劉方平工山水樹石。汧國公李勉甚重之。

王態官至潭州都督。善湘中山水。似李將軍。

王象有畫鹵簿圖。傳於代。

田琦。雁門人。善人物。并寫貌。官至汝南太守。

李述。工畫蠅蝶。蠶蟬之類。

李平均。唐宗室。工山水。官至陳留令。

白旻。工花鳥。官至澄城令。

韓嶷。工婦女。雜畫。善布色。

齊皎。高陽人。善外番人馬。尤工山水。官至澤州刺史。

齊映。皎弟。性雅正。好學。善山水。贈禮部尚書。

史瓚。官至省郎。善畫鞍馬人物。

戴重。席工子女。極精妙。

裴諝。字士明。河東人。畫山水。極有思。官至兵部尚書。

陳曇。字玄成。工山水。有情趣。但峯岫少奇。往往煩碎。官至衡州刺史。

顧况。字通翁。吳興人。頗好詩詠。善畫山水。

鄭寓。學昉。畫天王菩薩。有思。

沈寧善樹石山水。有格律。師張璪而少劣。

蕭祐畫山水。爲桂州觀察使。

劉整任祕書正字。善山水。同時有劉之奇。亦能山水。

強穎善水鳥。

陳庶揚州人。師邊鸞花鳥。尤善布色。

陳恪工山水。師張鄭。人物鞍馬蟲禽并精。子積善。山水妙過於父。

周太素善畫花鳥佛像。終尙書郎。

麴庭善山水。格不甚高。但細巧耳。

侯莫陳廈。字重構。工山水。用意極精。

王宏。太原人。畫人馬。永徽時人。

會稽僧道芬。滎陽鄭町。梁洽。青州吳恬。并善山水。芬格高。鄭淡雅。梁美秀。吳險巧。

牛昭善山水。

高道興。成都人。光化中。與趙德齊同畫西平王儀仗。授翰林待詔。

趙德元。長安人。天復中。入蜀。工畫車馬人物山水佛像屋木。

陳義。殷斂。殷季友。許琨。同州僧法明。錢國養。左文通。

人善寫貌。宋抱一。孟仲暉。已上皆開元時。

高江 車道政。

嗣滕王湛然。善畫花鳥。蠶蜨。官至太子詹事。

衛憲師周昉。花木竹雀。各造其妙。

張立不知何許人。蜀中畫跡甚多。亦能墨竹。

五代

王商不知何許人。工畫道釋仕女。尤精外國人物。與胡翼同時。並爲都尉趙崑所厚。

燕筠不知何許人。工畫天王筆法。師周昉。頗臻其妙。然不見他畫。獨天王傳於世。

支仲元鳳翔人。畫人物極工。筆法師顧陸。緊細有力。人物清潤不俗。其畫神仙人物。多作奕棋之勢。宋高

宗題作晉六朝者。多仲元所作。

左禮成都人。工畫道釋像。學吳道玄。描染與楊庭光相類。但行筆差細耳。宣和畫譜謂與張南本筆法相

似。圖畫見聞志謂與張南筆法相似。豈卽張南本也。

朱繇長安人。工畫道釋。妙得吳道玄筆意。所畫未有不以爲法者。時出新意。千變萬態。動人耳目。弟子趙

裔亦知名。

李昇成都人。善畫人物。尤善山水。筆意幽閒。人有得其畫。往往誤稱王右丞者焉。

杜子瓊華陰人。精意道釋。研吮丹粉。尤得其術。故彩繪特異。

杜覲龜秦人。避地居蜀。事王衍爲翰林待詔。博學強識。善畫佛像人物。始師常粲。後捨舊學。自成一家。故

筆法凌轍輩流。粲亦莫能接武也。

張玄。苗本作元。簡州金水石城山人。善畫。尤以羅漢得名。

曹仲元。建康豐城人。江南李氏時爲翰林待詔。畫道釋鬼神。初學吳道玄。不成。棄其法。別作細密。自爲一家。尤工傅彩。

陸晁。嘉禾人。善人物。多畫道釋神仙。性疎野。每沉湎於酒。遇筆揮灑。略不預構。故妍醜互出。當其合作。描法甚細而有力。有一等繆畫。麓惡可厭。亦其所作。

僧貫休。俗姓姜氏。字德隱。婺州蘭溪人。初以詩得名。後入兩川。頗爲王衍待遇。因賜紫衣。號禪月大師。能畫。間爲本教像。唯羅漢最著。其畫像多作古野之貌。不類世間所傳。

梁駙馬都尉趙崑。本名霖。後改今名。喜丹青。尤工人物。格韻超絕。非尋常畫工所及。尤能鑒畫。杜霄善畫仕女。得周昉筆法爲多。尤工蠶蜨及曲眉豐臉之態。非風流蘊藉有王孫貴公子之思致者。未易得之。

丘文播。廣漢人。又名潛。與弟文曉俱以畫得名。初工人物。兼作山水。後多畫牛。時稱奇絕。子仁慶善畫。尤長花雀。

丘文曉。與文播齊名。山水亦工。

阮郛。不知何許人。入仕爲太廟齋郎。善畫。工寫人物。特於士女得纖穠淑婉之態。但傳於世者甚少。婦人童氏。江南人。莫詳其世系。所學出王齊翰。工畫道釋人物。童以婦人而能丹青。故當時縉紳家婦女。

往往求寫照焉。後不知所終。

胡翼字鵬雲。工畫道釋人物車馬樓臺山水。種種臻妙。嘗臨模古今名筆。目之曰安定鵬雲記。

衛賢長安人。江南李氏時爲內供奉。長於樓臺人物。初師尹繼昭。後伏膺吳體。其畫高崖巨石。則渾厚可

取。而皴法不老。爲林木。雖勁挺而枝梢不稱其本。論者少之。然至妙處。亦人希及。

李贊華本北虜東丹王。後唐明宗賜姓名。善畫本國人物鞍馬。不作中國衣冠。亦安於所習者也。然議者

謂馬尙豐肥。筆乏壯氣。

王仁壽汝南宛人。石晉時作待詔。工畫道釋鬼神及馬。始師王殷。後學精吳法。

房從真成都人。工畫人物番騎。王蜀時爲翰林待詔。

袁羲河南登封人。爲侍衛親軍。善畫魚。窮其變態。得噉嚼游泳之狀。非世俗所畫庖中物也。

僧傳古四明人。畫龍獨造乎妙。弟子德饒。無染皆臻其妙。

關仝原注一名種。長安人。畫山水。師荆浩。晚年有出藍之美。所畫脫略毫楮。筆愈簡而氣愈壯。景愈少而

意愈長。深造古淡。石樹出於畢宏。有枝無幹。當時郭忠恕亦師事之。然仝於人物非所長。多求胡翼爲之。

杜楷原注一作楷。成都人。善山水。作枯木斷崖雲崦烟岫之態。思致頗達。

羅塞翁隱之子。爲吳中從事。喜丹青。善畫羊。精妙卓絕。

張及之京兆人。畫犬馬花鳥。頗工作犬。得敦龐之狀。無搖尾乞怜之態。



道士厲歸真。莫知其鄉里。善畫牛虎。並工竹雀鷺禽。筆簡意盡。氣韻蕭爽。坡岸山林亦佳。李靄之。華陰人。善畫山林泉石。尤喜畫貓於藥苗間。雅爲羅紹威所厚。建一亭爲靄之援毫之所。名曰金

波。時號金波處士。

胡擢。不知何許人。博學能詩。氣韻超邁。善畫花鳥。亦詩人感物之作也。

梅行思。原注一作再思。江夏人。畫人物牛馬。最工於雞。爲南唐李氏翰林待詔。品目甚高。

郭乾暉。北海營丘人。世呼爲郭將軍。工畫鷺鳥雜禽。疎篁槁木。田野荒寒之景。格律老勁。曲盡物性之妙。

鍾隱。亦一時名流。變姓名師事久之。方授以筆法。

郭乾祐。乾暉弟。工花鳥。雖不如兄所學。亦相上下。

鍾隱。天台人。善畫鷺鳥榛棘。能以墨色淺深。分其向背。變姓名師郭乾暉。深得其妙。兼工畫山水人物。

黃筌。字要叔。成都人。始學畫師刁光。早得時名。十七歲事蜀王衍。爲待詔。至孟昶。加檢校少府監。累遷如

京副使。花竹師滕昌祐。鳥雀師刁光。山水師李昇。鶴師薛稷。人物龍水師孫位。資諸家之善。而兼有之。

無不臻妙。

黃居寶。字辭玉。筌次子。工畫。得家傳。兼以八分書知名。事蜀爲待詔。累遷至水部員外郎。其畫石。文理縱

橫。爽砂爽石。稜角峭硬。如虬如虎。

黃居實。紹興祕閣中有會禽圖一。而諸書不載其名。筌有五子。不審其爲第幾人。

滕昌祐。字勝華。吳人。後游蜀。以文學從事。初不婚宦。志趣高潔。脫略時態。工畫花鳥。蟬蝶。折枝生菜。傅彩

鮮澤宛有生意。尤長於畫鵝。蓋其觀動植而形於筆端。未嘗專於師資也。兼善書大字。

李頗。原注一作坡。南昌人。善畫竹。氣韻飄舉。不求小巧。而多於情。任率落墨。便有生氣。然所傳於世者不多。

韓虬。原注一作求。李枳。原注一作祝。不知何許人。皆倜儻不拘。有經略才能。屬唐祚陵季。遂退藏不仕。以丹青自娛。學吳道玄。尤長於道釋。好游。晉唐間爲李克用所殺。

張圖。字仲謀。河南洛陽人。朱梁時將軍。少穎悟而好丹青。及善潑墨山水。皆不由師授。自致神妙。亦不法古今。自成一體。尤長於大像。其畫用濃墨。籠筆如草書。顛掣飛動。勢甚豪放。至於手面及服飾儀物。則用細筆。輕色。詳緩端慎。無一畝吳。怪怪奇奇。自成一家法。

朱瑤。字溫琪。不知何許人。學吳道子。由是知名。跋異。汧陽人。善畫佛道鬼神及大像。

陶守立。池陽人。世業儒。保大間應舉下第。退居齊山。閉門卻掃。以詩酒丹青自娛。善畫道釋鬼神殿閣車馬山川人物。靡不精妙。

竹夢松。建康溧陽人。仕南唐爲東川別駕。善畫人物仕女臺閣。冠絕當代。其布景命意。綽約體態。宛得周昉之格。

施璘。字仲寶。京兆藍田人。工畫竹。有生意。爲當時絕伎。丁謙。義宜人。工畫竹。師蕭悅。兼善寫蔬果。

何遇。河南長水人。善畫宮室。慕衛賢筆法。尤善山水樹石。爲當時所稱。其間人物。則假手於人。梁相國子兢。善畫牡丹。幼年從學。因觀檻中牡丹。乃命筆倣之。不浹旬奪真。後遂酷思無倦。動必增奇。梁左千牛衛將軍劉彥齊。善畫竹。頗臻清致。有孟宗泣竹。湘妃寺圖。傳於世。人物多假胡翼之手。尤能鑒別圖繪。皆極精當。

王殷。工畫佛道士女。尤精外國人物。

李羣。字文幹。唐宗室。工畫人物。爲世所稱。

李玄應。洎弟玄審。並工畫蕃馬。專學胡環。

韋道豐。江夏人。善畫人物。寒林逸思。奇僻不拘小節。當代珍之。然經歲月方成一圖。成則驚人。

朱簡章。江夏人。工畫人物屋木。

王喬士。工畫佛道人物。

鄭唐卿。工畫人物。兼長寫貌。

郭權。江南人。師鍾隱。

史瓊。善畫雉兔竹石。

程凝。善畫鶴竹。兼長遠水。

王道古。善畫雀竹。當時號雀兒王。

唐垓。善畫野禽生菜水族諸物。世稱精妙。

王道求工畫佛道鬼神人物畜獸始倣周昉後學盧稜迦當時名手歎伏  
宋卓工畫道釋志學吳筆不事傅彩

富玖工畫佛道

黃延浩工畫人物

王偉工畫道釋

張質定州人工畫田家風俗

宋藝蜀郡人工寫貌王蜀爲翰林待詔

阮知誨成都人工畫貴戚子女兼長寫貌事王蜀爲待詔

高從遇道興之子襲父藝爲孟蜀翰林待詔

阮惟德知誨之子紹精父業事孟蜀爲翰林待詔尤善狀宮闈禁苑皇妃帝戚富貴之事精妙頗甚

杜敬安覲龜之子事孟蜀爲翰林待詔妙於佛像尤能傅彩孟州名畫錄載爲杜子瓌子未知孰是

趙忠義元德之子事孟蜀爲翰林待詔雖從父訓宛若生知

蒲宗訓蜀人事孟蜀爲翰林待詔師房從真畫人物鬼神筆法雖細其勢甚壯

蒲延昌宗訓養子爲孟蜀待詔工畫佛道鬼神尤精獅子行筆勁利用色不繁

張玫成都人爲孟蜀翰林祇候工畫人物士女兼長寫貌

徐德昌成都人爲孟蜀翰林祇候工畫人物士女墨彩輕媚爲時所稱

周行通成都人。工畫鬼神。人馬鷹犬嬰孩。得其精妙。

孔嵩蜀人。善畫龍兼工花雀與蟬。師刁處士。

趙才蜀人。工畫人物鬼神。亦長甲騎。

姜道隱漢州緜竹人。齟齬好畫。及長不事產業。惟畫是好。布衣芒屨。隨身筆墨而已。嘗於淨衆寺畫山水。

松石。趙庭隱贈之十縑拂衣而去。

楊元貞石城山張玄外族也。工畫釋道羅漢。善爲曹筆。尤精布色。始居蜀。後召入鄴中。不回。

董從誨成都人。世本儒家。心游繪事。佛道人物。舉意皆精。

張景思金水石城山張玄之裔。工畫佛道。

朱悰不知何許人。與衛賢并師尹繼昭。

僧楚安漢州什邡人。俗姓勾氏。善畫山水人物樓臺。點綴甚細。論者謂筆蹤全虧六法。非大手高格。

僧智蘊河南人。工畫佛像人物。學深曹體。

僧德符善畫松柏。氣韻蕭灑。住汴州相國寺。

李文才華陽人。工畫人物屋木山水。善寫真。時輩罕及。周昉之亞也。事孟蜀爲翰林待詔。

杜弘義蜀州晉原人。工畫佛像羅漢。

程承辨眉州彭山人。工畫人物鬼神。

僧令宗乃丘文播異姓弟。工山水人物佛像。天下。



道士李壽儀。邛州人。宗張簡卿筆法。多畫道門尊像。人呼爲李水墨。

吳越王錢鏐畫墨竹。

朱澄。專江南。李中主爲翰林待詔。工畫屋木。嘗與高太冲等合畫雪景宴圖。時稱絕手。

高太冲。江南人。工傳寫。事李中主。爲翰林待詔。嘗寫中主真。得其神思。

浙僧蘊能。工雜畫。善畫佛像。

李夫人。西蜀名家。未詳世胄。善屬文。尤工書畫。郭崇韜伐蜀得之。夫人以崇韜武弁。常鬱悒不樂。月夕獨

坐南軒。竹影婆娑。可喜。卽起揮毫濡墨。模寫窗紙上。明日視之。生意俱足。或云。自是人間往往效之。遂有墨竹。

李仁章。并州人。學吳畫。長於鬼神。當時論非盧稜迦無以並轡。

杜韜。京兆人。少爲富商。師衛賢。深得其要。賢後延爲東榻。所畫與賢相爲伯仲。此三字苗本作似。但此下

苗本有傷於二字。奇巧不老耳。

趙宏。字德彰。善畫花鳥。變邊鸞古體。而奪真像生也。

卷三

宋

仁宗天資穎悟。聖藝神奇。遇興援毫。超逾庶品。獻穆公主喪明。親畫龍樹菩薩。命待詔傅模鏤板印施。又

嘗畫馬。上有押字并御寶。

徽宗萬幾之暇。惟好書畫。興學較藝。如取士法。丹青卷軸。具天縱之妙。有晉唐風韻。尤善墨花石。作墨竹。緊細不分。濃淡一色。焦墨蘊密。處微露白道。自成一家。不蹈襲古人軌轍。尤注意花鳥。點睛多用墨漆。隱然豆許。高出縑素。幾欲活動。畫後押字。用天水及宣和政和小璽志。或用瓢印蟲魚篆文。

燕恭肅王元儼。名重咸藩。精於像物。畫鶴竹圖。曲盡其妙。嘗自榜十六羅漢。令蜀人尹質描染。稜稜風骨。非常人所能及。

鄆王楷。徽宗第二子。善畫花鳥。極爲精到。尤善墨花。但用墨粗欠生動耳。

孫夢卿。字輔之。東平人。工畫道釋人物。深得吳法。世謂之孫吳生。

孫知微。字太古。眉陽彭山人。世本田家。天機穎悟。善畫。初非學。而能清淨寡欲。飄飄然真神仙中人。喜畫道釋。用筆放逸。不蹈襲前人筆墨畦畛。時輩稱服。描法甚老。黃筌不能及也。

勾龍爽。蜀人。好丹青。喜爲古衣冠。多作質野不媚之狀。尤善嬰孩。得其態度。國初爲翰林待詔。

陸文通。江南人。畫山水道釋樓臺。得名于時。山水學董元。巨然。畫道釋尤工作神仙故實。

王齊翰。金陵人。事江南李後主。爲翰林待詔。畫道釋人物。多思致。好作山林丘壑。隱嵩幽卜。無一點朝市風埃氣。

顧德謙。建康人。善畫人物。多喜寫道像。此外雜工動植。風格特異。論者謂王維不能過。而李後主亦嘗謂之曰。古有凱之。今有德謙。其愛重如此。

侯翌字子冲安定人善畫端拱雍熙之間聲名籍甚學吳生落墨清駛行筆勁峻峭拔而秀絢麗而雅亦畫家之絕藝也始年十三師郭巡官郭忘其名越四年所學過郭遠甚慮掩郭名徙寓秦川

武洞清長沙人父岳學吳生工畫人物尤長於天神星象用筆純熟洞清能世其學過父遠甚作佛像羅漢善戰掣筆作髭髮尤工布置落墨神妙不俗

楊棐京師人客游江浙後居淮楚善畫道釋人物學吳生尤於觀音得名天下其子圭有父風描像手面作極細筆

武宗元字總之河南白波人官至虞曹外郎善丹青長於道釋造吳生闕奧行筆如流水神彩活動大抵如寫草書奇作也

道士李德柔字勝之河東晉人徙居西洛喜讀書丹青之技不學而能多畫神仙故實蓋其夙世之習也尤工寫貌其設色所設朱鉛多以土石爲之故世俗不能宣和中爲凝神殿校籍

道士徐知常字子中建陽人能詩善屬文尤通道儒典教畫神仙事明其本末宣和中除蕊珠殿侍晨周文矩金陵句容人事李煜爲翰林待詔善畫道釋人物車馬樓觀山林泉石尤精士女其行筆瘦硬戰掣蓋學其主李重光書法至畫仕女則無顛筆大約體近周昉而纖麗過之

石恪字子專成都人性滑稽有口辨工畫佛道人物始師張南本技進益縱逸不守繩墨多作戲筆人物詭形殊狀惟面部手足用畫法衣紋皆粗筆成之

李景道南唐李昇親屬喜丹青而無貴公子氣作文會圖頗極其思

李景遊。景道季孟行也。好畫。人物極勝。作談道圖。風度不凡。

顧闓中。江南人。事李氏。爲待詔。善畫。人物。嘗與周文矩同畫韓熙載夜宴圖。

顧大中。江南人。善畫牛馬。兼工花竹。

郝澄。字長源。金陵句容人。作道釋人馬。筆法清勁。善設色。尤工寫貌。畫鑿載曾見澄畫馬甚俗。不過一工人所爲。殊無古意。二說未知孰是。當質諸博古者。

湯子昇。蜀人。畫山水人物。頗工。有鑄鑑圖。傳於世。描法佳。

李公麟。字伯時。號龍眠居士。舒城人。登進士第。博覽法書名畫。故悟古人用筆意。作書有晉宋風格。繪事集顧陸張吳及前世名手所善。以爲己有。專爲一家。作畫多不設色。獨用澄心堂紙爲之。惟臨摹古畫。用絹素著色。筆法如雲行水流。有起倒。論者謂鞍馬逾韓幹。佛像追吳道玄。山水似李思訓。人物似韓滉。瀟灑如王維。當爲宋畫中第一。照映前古者也。官至朝奉郎。

內臣楊日言。字詢直。開封人。喜經史。作篆隸八分。畫山林泉石人物。荒遠蕭散。氣韻高邁。非世俗得以擬倫。尤精寫照。官至昭化軍節度使。

郭忠恕。字恕先。雒陽人。少能屬文。周時爲博士。能篆隸。善畫樓觀木石。皆極精妙。始亦嘗師關仝。太宗素知其名。召爲國子監主簿。後忤旨。流登州。至齊之臨邑道中。尸解仙去。

趙克夔。宗室。戲弄筆墨。游魚盡浮沉之態。封高密侯。

趙叔讎。宋宗室。善畫。多得意於禽魚。每下筆。皆合詩人句法。景物雖少。而意常多。

董羽字仲翔毗陵人善畫魚龍海水其涵湧瀾翻咫尺汗漫莫知其涯涘也事南唐爲待詔後歸宋爲圖畫院藝學

楊暉江南人善畫魚得其揚髻鼓鬣之態

徐易暨弟白海州人善畫魚極得其形似論者謂其皆作出水鱗不過刀机間物耳兼工雜畫尤能篆隸爲御書院藝學

宋永錫蜀人畫花竹禽鳥魚蟹學梁廣善傅色

劉來少時流寓京師狂逸不事事放意詩酒間善畫水中魚雖風萍水荇觀之活動至於鱗尾性情遊潛迴泳皆得其妙官至朝奉郎

董源江南人事南唐爲後苑副使善畫山水樹石幽潤峯巒清深得山之神氣天真爛熳意趣高古論者謂其畫水墨類王維著色如李思訓兼工龍水無不臻妙其山石有作麻皮皴者有著色皴紋甚少用色濃古人物多用青紅衣人面亦用粉素皆佳作也

李成字咸熙唐宗室避地營邱遂家焉世業儒善文磊落有大志因才命不偶放意詩酒寓興於畫師關仝凡烟雲變滅水石幽閒樹木蕭森山川險易莫不曲盡其妙議者謂得山之體貌爲古今第一子覺職踐館閣贈光祿丞

范寬原注一作中正字中立華原人性溫厚嗜酒落魄有大度人故以寬名之畫山水始師李成又師荆浩山頂好作密林水際作突兀大石旣乃嘆曰與其師人不若師諸造化乃捨舊習卜居終南太華徧



觀奇勝。落筆雄偉老硬。真得山骨。而與關李並馳。方駕也。晚年用墨太多。土石不分。許道寧。長安人。學李成。畫山水。初賣藥都門。畫山水以聚觀者。故蚤年所畫俗惡。至中年脫去舊學。稍自檢束。行筆簡易。風度益著。峯頭直皴而下。林木勁硬。自成一家。體至細微處。始入妙理。評者謂得李成之氣。

陳用志。潁川鄆城人。居小窰鎮。人呼爲小窰陳。國初爲畫院祇候。名達按。侯應作候。已而告歸鄉里。工畫道釋山林。亦善人馬。學胡環而多出己意。雖詳悉精微。但疎放全少。無飄逸處也。

翟院深。營丘人。師李成。畫山水爲本郡俗人。郡宴方擊鼓。頓失節奏。部長舉其過。守詰之。翟對曰。性本好畫。操搨之次。忽見浮雲在空。宛若奇峯。可爲畫範。目不兩視。故失其節。翌日。命院深爲畫。果有疎突之勢。甚異之。其臨摹李成。彷彿亂真。若論神氣。則霄壤也。評者謂得李成之風。

高克明。絳州人。端愿謙厚。喜游佳山水。搜奇訪古。歸則燕坐靜室。故景造筆下。亦喜道釋人馬花鳥樓觀。評者謂其山水雖工。不免有畫人之習。無深厚高古之氣。仁宗朝爲待詔。守少府監主簿。

郭熙。河陽溫縣人。爲御畫院藝學。善山水寒林。宗李成法。得雲烟出沒。峯巒隱顯之態。布置筆法。獨步一時。蚤年巧贍致工。晚年落筆益壯。

孫可元。不知何許人。好畫。吳越間山水。筆力雖不至豪放。而氣韻高古。

趙幹。江南人。爲南唐畫院學生。畫山水林木。皆江南風景。多作樓觀舟船水村漁市花竹。散爲景趣。無一點朝市風埃。

屈鼎開封人。畫山水。學燕文貴。頗有思致。仁宗朝爲畫院祇候。

陸瑾江南人。善畫江山風物。落筆瀟灑。殊無塵埃之氣。筆法布置。大抵宗王維。嫵媚過之。

王士元汝南宛丘人。王仁壽之子。善丹青。兼諸家之妙。人物師周昉。山水師關仝。屋木師忠恕。凡所下筆。無一筆無來處。故皆精微。但多作樓臺橋徑。如家中景。乏深山大谷烟霞之氣耳。官止郡推官。

燕肅字穆之。本燕人。徙居曹。今爲陽翟人。文學治行。縉紳推之。喜畫山水寒林。蹈王維之蹤。做李成之範。獨不爲設色。官至禮部尙書。後贈太師。

宋道字公達。洛陽人。擢第爲郎。善畫山水。閒淡簡遠。取重於時。但乘興卽寓意而作。傳世故少。

宋迪字復古。道之弟。以進士擢第爲郎。師李成。畫山水。運思高妙。筆墨清潤。又喜畫松。或高或偃。或孤或雙。以至於千萬株。森森然。殊可駭也。其猶子子房。亦得家法。

王穀字正叔。潁川鄆城人。寓意丹青。多取今昔人詩詞意趣。寫而爲圖繪。故鋪張布置。率皆瀟灑。官至大理卿。

范坦字伯履。洛陽人。善畫山水。其筆法學關仝。李成。兼工花鳥。游藝繪事。下筆老健。官至承議郎。

黃齊字思賢。建陽人。擢第爲兵部侍郎。寓興丹青。作風烟欲雨圖。非陰非霽。如梅天霧曉。霏微曖靄之狀。殊有深思。

李公年不知何許人。善畫山水。運筆立意。風格不下於前輩。所布置者。甚有山水雲烟餘思。嘗爲江浙提刑。

李時雍字致堯號適齋成都人崇寧間爲書學諭寓意丹青皆不凡作墨竹尤高與文同並馳官至殿中丞

駙馬都尉王誥字晉卿本太原人後爲開封人喜讀書屬文所從遊者皆一時之老師宿儒能畫學李成山水清潤可愛又作著色山水師唐李將軍不古不今自成一家畫墨竹師文湖州築堂曰寶繪收藏古今法書名畫以爲勝玩東坡爲之記

內臣童貫字道輔開封人御下寬厚能節制兵戎時弄翰墨戲作山林泉石人以其珍玩官至太傅

內侍劉瑗字伯玉開封人家多奇畫尤能考覈真僞皆極精當放筆作雲林泉石頗復瀟灑官至通侍大夫贈少師

內侍梁揆字仲敍開封人善丹青花竹人物山水一一能之官至直睿思殿

內侍羅存字仲通開封人性喜畫作小筆山水雖身在京國而浩然有江湖之思致官至尙食局奉御

內侍馮覲字遇卿開封人少好丹青作江山四時之景頗極精妙慕王晉卿筆墨臨做亂真官至武翼大夫

僧巨然鍾陵人善畫山水筆墨秀潤善爲烟嵐氣象於峯巒嶺竇之外至林麓之間猶作卵石松柏疎筠蔓草之類相與映發而幽溪細路屈曲縈帶竹籬茅舍斷橋危棧真若山間景趣也得董源正傳者巨然爲最也少年時鑿頭多老年平淡趣高

趙令松字永年大年弟工畫花竹無俗韻尤工作水墨花果但作朽蠹太多論者或病之兼畫犬得名於

時官至右武衛將軍。

趙邈。隤亡其名。朴野不事修飾。故人以邈隤稱。不知何許人也。善畫虎。不惟得其形似。而氣韻俱利。樹石亦佳。如草書法。

朱義。江南人。畫牛得名。作斜陽芳草村落荒閒之趣。雖望戴嵩不及。而亦後來名家。朱瑩。義族也。畫牛馬得名。尤工人物。

甄慧。睢陽人。善畫佛像。脫落世間形相。具天人之威儀。亦工畫牛馬。而留意甚精。王凝。不知何許人。爲畫院待詔。畫花竹翎毛。下筆有生意。又工爲鸚鵡獅貓等。

祁序。江南人。工畫花竹禽鳥。又工畫牛。人或謂有戴嵩遺風。至於畫貓。近世亦罕有其比。何尊師。不知何許人。居衡岳。往來蒼梧五嶺。僅百餘年。人問其氏族年壽。但云何何。問其鄉里。亦曰何何。

時人因號曰何尊師。喜戲弄翰墨。工作花石。尤以畫貓專門。爲時所稱。

趙宗漢。字獻甫。太宗曾孫。漢王幼子。博雅該洽。無聲色之好。惟以丹青自娛。嘗爲雁圖。氣韻瀟散。有江湖荒遠之趣。贈太師。追封景王。

趙孝穎。字師純。端獻魏王第八子。翰墨之餘。雅善花鳥。頗有思致。仕至德慶軍節度使。

趙仲侔。字隱夫。宋宗室。明敏無他嗜好。一意於文詞翰墨間。至於難狀之景。則寄興於丹青。善作草木禽鳥。皆詩人之思致也。封和國公。

趙仲僖。字存道。宋宗室。長於宮邸。雅好繪畫。善花鳥。出遊以筆籠粉墨自隨。遇興見高屏素壁。隨意作畫。

趣或求則未必應也。追封榮國公。

趙士雷

宗室善畫寒林晴浦甚多思致其竹石禽鳥亦稱是官任武節郎。

趙士雷別本作雷字公震宋宗室畫山水人物清雅可愛尤長於花鳥官至襄州觀察使。

李植字化光京兆人觀察使士衡之孫自幼好道不樂婚宦工畫山水劉貢父嘗贊之。

宗婦曹氏雅善丹青所畫花鳥等皆非優柔軟媚取說兒女者真若得於游覽見江湖山川間勝概以集於豪端耳。

南唐後主李煜字重光自稱鍾峯隱居又略其言曰鍾隱後人能文善書畫書作顫筆樛曲之狀適勁如

寒松霜竹謂之金錯刀畫山水人物禽鳥墨竹皆清爽不凡別爲一格然書畫同體高出意外。

黃居寀字伯鸞蜀人筌之季子初仕孟蜀爲翰林待詔能世其家學作花竹翎毛皆妙得其真寫怪石山

景往往過其父宋太宗朝授光祿丞委之搜訪名畫詮定品目時輩莫不斂衽當時較藝者視黃氏體

製爲優劣去取自崔白崔懋吳元瑜出其格遂大變。

丘慶餘蜀人文播之子善畫花禽兼長於草蟲凡設色者已逼真於動植至其草蟲獨以墨之淺深暎發

亦極形似之妙風韻高雅爲世所推初師滕昌祐及晚年遂過之。

徐熙金陵人世爲江南顯族熙所尙高雅寓興閒放畫花木禽魚蟬蝶蔬果妙奪造化今之畫花者往往

以色暈淡而成獨熙落墨以寫其枝葉蕊萼然後傅色故骨氣風神爲古今絕筆所畫多在澄心堂紙

上至於畫絹絹文稍麗米元章謂徐熙絹如布是也議者謂黃筌之畫神而不妙趙昌之畫妙而不神

兼二者一洗而空之其爲熙歟孫崇嗣崇勳亦頗得其所傳焉。

徐崇嗣熙之孫畫花鳥綽有祖風又出新意不用描寫止以丹粉點染而成號沒骨圖以其無筆墨骨氣而名之始於崇嗣也。

徐崇矩熙之孫崇嗣崇勳其季孟焉畫花鳥能不墜家學作士女益工曲眉豐臉蓋寫花蝶之餘思也。

唐希雅嘉興人妙於畫竹作翎毛亦工學江南李後主金錯刀書有一筆三過之法雖若甚瘦而風神有餘變而爲畫故顛掣三過處書法存焉喜作棘檟荒野之趣氣韻蕭疎非畫家繩墨所拘也。

唐宿唐忠祚皆希雅之孫善畫花竹翎毛得世傳之妙墨作棘鍼雖易元吉不能及之。

趙昌字昌之廣漢人善畫花果名重一時初師滕昌祐後過其藝作折枝有生意傅色尤造其妙兼工於草蟲蓋其所作不特取其形似直與花傳神也禽石非其所精。

易元吉字慶之長沙人初工花鳥及見趙昌畫乃曰世不乏人遂遊荆湖搜奇訪古幾與獼狔鹿豕同游故口傳心繫之妙一寫於豪端又於長沙舍後開圃鑿池以亂石藂篁梅菊葭葦馴養水禽山獸以伺其動靜資於畫思故寫動植無出其右尤喜畫獼狔評者謂徐熙已後一人而已畫上多自書長沙助教易元吉畫。

崔白字子西濠梁人善畫花鳥道釋人物山林飛走之類尤長於寫生極工於鵝所畫無不精絕宋畫院較藝者必以黃筌父子筆法爲程式自白及吳元瑜出其格遂變宋仁宗朝畫垂拱殿御辰稱旨補圖



崔慤字子中。崔白弟。工畫花鳥。推譽於時。筆法規模。與白相若。尤喜作兔。自成一家。官至左班殿直。艾宜。金陵人。善畫花竹禽鳥。能傅色暈淡。有生意。孤標雅致。別是風規。敗草荒榛。尤長野趣。尤喜畫鶴。鶴者名於時。

丁貺。濠梁人。善畫花鳥。

葛守昌。開封人。畫苑祇候。善畫花鳥。率有生意。又工於草蟲蔬菜等物。蓋其所兼耳。

王曉。泗州人。善畫鳴禽。藜棘鷹鷂。師郭乾暉。而遊其藩。亦能畫人物。極古拙。嘗於李成讀碑圖上見之。

劉常。金陵人。善畫花竹。氣格清秀。名重江左。家治園圃。植花竹。日遊息其間。得意輒索紙落筆。遂與造物

者爲友。染色不以丹鉛。襯傅調勻深淺。一染而就。米海岳謂常之所學不減趙昌。

武臣。劉永年。字公錫。本彭城人。後徙開封。因家焉。喜讀書。曉兵法。勇力兼人。能從事丹青。出人意表。作鳥

獸蟲魚。頗工。尤喜寫道釋人物。得貫休之奇逸。而用筆非畫家纖豪細管。遇得意處。雖聖帝可用。此畫

史所不能及也。官至崇信軍節度使。

武臣。吳元瑜。字公器。開封人。善畫花鳥人物山林。師崔白。描法纖細。傅染鮮潤。大變唐五代宋國初之法。

自成一家。晚年因求畫者多。因取他畫或弟子所模寫。冒以印章。謬爲己筆。以塞其責。官至合州團練

使。

內侍賈祥。字存中。開封人。少好工巧。至於丹青之習。頗極其妙。作竹石草木鳥獸樓觀。皆工。亦善人物。官

至知內侍省事。贈少師。

內侍樂士宣字德臣。祥符人。善丹青。獨喜金陵艾宣畫。久乃悟宣之拘窘。於是捨其故步。而筆法遂陵轍。於前輩善畫花鳥。尤工水墨。官至虔州觀察使。贈少保。

內侍李正臣字端彥。工寫花竹禽鳥。頗有生意。官至文思使。

內侍李仲宣字象賢。始專於窠木。後喜工畫鳥雀。頗造其妙。其所缺者風韻蕭散。蓋亦有所未至焉。官至內侍省供奉官。

端獻王頴。英宗第四子。能篆籀。飛白。戲作小筆花竹蔬果。尤喜寫墨竹。無不曲盡其妙。

趙令穰字大年。宋宗室。游心經史。戲弄翰墨。尤得於丹青之妙。所作甚清麗。雪景類王維筆。汀渚水鳥有江湖意。又學東坡作小山蘂竹。思致殊佳。但筆意柔嫩。實年少好奇耳。

趙令庇。宋宗室。善畫墨竹。宗文同。凡落筆瀟灑可愛。官至衡州防禦使。

越國夫人王氏。端獻王婦。王審琦後。作篆隸有古法。爲小詩。有林下風致。以淡墨寫竹。整整斜斜。曲盡其態。見者疑其影落縑素。

駙馬都尉李瑋。字公炤。其先錢唐人。尙仁宗。充國公主。善作水墨畫。竹石亦佳。尤善草草飛白散隸。官至平海軍節度使。

劉夢松。江南人。善以水墨作花鳥。於淺深之間。互相暎發。雖采繪無以加也。尤精於墨竹。

文同字與可。梓潼永泰人。稱石室先生。又自號笑笑先生。錦江道人。善畫墨竹。知名于時。或戲作古槎老杙。淡墨一掃。雖丹青極豪楮之妙者。形容所不能及也。亦善山水。官至司封員外郎。充祕閣校理。

李時敏字致道。成都人。時雍之弟。尤工大字。妙於丹青。宣和內府有詩意圖。官至朝請郎。閻士安宛丘人家。世業醫。性喜作墨戲。荆檟枳棘。荒崖斷岸。蟹燕蒲藻。皆極精妙。尤長於竹。下筆清勁。造

形圓備。官至國子助教。

梁師閔。一作士閔。字循德。開封人。能詩。好畫花竹羽毛。官至忠州刺史。

僧夢休。江南人。喜丹青。學唐希雅。作花竹禽鳥。盡物之態。

武臣郭元方。字子正。開封人。善畫草蟲。信手寓興。俱有生態。官至內殿承制。

武臣李延之。善畫蟲魚草木禽獸。寫生尤工。官至左班殿直。

僧居寧。毗陵人。喜飲酒。酒酣則好爲戲墨。作草蟲筆力勁峻。不專於形似。每自題云。居寧醉筆。

王瓘。字國器。河南洛陽人。工畫道釋人物。深得吳法。世謂之小吳生。武宗元謂瓘畫事物盡工。設色清潤。

古今無倫子端。能世其學。

王靄。開封人。畫佛像人物。追學吳生。能盡其妙。尤長於寫真。太宗朝授翰林待詔。

趙光輔。耀州華原人。太宗朝爲畫院學生。工畫佛道人物。兼精蕃馬。筆鋒勁利。名刀頭燕尾。

高益。涿郡人。工畫道釋鬼神蕃漢人馬。用墨重。傅色輕。變通應手不拘一態。

孟顯。字坦之。安化華池人。畫佛道鬼神人馬屋木。筆無少滯。轉動飄逸。出自己意。自成一家。大率作用氣

格與陳用智相似。

張昉。字升卿。汝南人。工畫佛道人物。學吳生。僅得其法。然用意敏速。變態皆善。

王端字子正山東人。瓘之子。喜讀書。工畫山水人物花竹。山水專師關仝。好爲罅石澗水。怪樹老根。有出人意思。亦善墨竹。取唐希雅生竹情狀而爲之。故於背向不失。尤長寫真。畫鑿謂端人物古拙。無神氣。描法不秀。

厲昭慶建業人。工畫佛道人物。尤長於觀音。至於衣紋生熟。亦能分別。前輩殆不及。授圖畫院祇候。王兼濟洛陽人。工畫釋道鬼神學。吳道玄得其餘趣。

高文進蜀人。從遇之子。工畫佛道師倣曹吳。筆力快捷。施色鮮潤。太宗朝爲翰林待詔。

趙元長原注一作長元。字慮善。蜀人工畫道釋人物。兼工翎毛。授圖畫院藝學。

趙元亨字彥德。原注一字懷寶。開封人。工畫釋道人物。兼長屋木。多狀京城市肆車馬。盡事物之情。

孫懷說安定靈臺人。工畫道釋人物。學吳生。略得其奧。乘輿命筆。往往稱絕。評者謂氣格清峭。理致深遠。

南簡平涼人。性簡傲。閉門獨居。以畫自樂。工畫佛道人物。傳于世者絕少。

王道真字幹叔。蜀郡新繁人。善畫佛道人物。兼長屋木。太宗朝爲畫院祇候。亦善畫。兼得楊輝之奧。

陳士元開封人。初名允。喜丹青之學。尤好王士元筆。遂改其名。至于畫屋宇車騎子女皂隸。及人家景物。

若太湖石芭蕉花之類。皆如王士元之迹。

王拙字守拙。河東人。工畫佛道人物。雖放縱矜逸。往往失於卑懦。

王居正拙之子。學丹青。有父風。善畫仕女。師周昉。得其閒冶之態。然精密有餘。而氣韻不足。

葉進成江南人。善畫人物士女。設色清潤。頗得閻令之體。

燕文貴吳興人。隸軍中。善畫山水及人物。初師河東郝惠。又善畫舟船盤車。其作山水。不專師法。自成一  
家。細碎清潤可愛。然取其骨氣。無有也。

葉仁遇。江南人。進成族弟。工畫人物。多狀江表市肆風俗。田家人物。

毛文昌。字則之。蜀人。好畫郊野村堡人物。能與真迫。又爲村童入學圖。其行步動止。拜立誦寫。備其風概。  
商訓不知何許人。善鼓琵琶。工畫山水。師范寬。但筆勢勾斫。山石少皴。頗失之拙。宋畫評載學關仝。  
黃懷玉。華原人。有足疾。時人目爲跛子。學范寬。頗有其格。蓋意思孤特。得其岩嶠之骨。樹木皴剝。人物清  
灑。然大約失之工。向嘗見一本清潤可愛。而往往傳世者皆無足觀。恐是僞作耳。

紀真亦學范寬。失之似。

劉永開。封人工畫山水。始師僧德符。畫松石。後觀關仝畫。遂捐棄餘學。專法關氏。意思筆墨。頗得其法。  
李隱。五原人。善畫山水。其勢超峻。截空而立。復有平遠之趣。止以焦墨皴淡。全無勾斫。

龐崇穆。字季和。右北平人。工畫山水。能爲羣峯列岫。雲烟聚散之象。大中祥符中。欲授以畫院之職。遽去  
不仕。

曹仁希。字企之。毗陵人。善畫水。爲驚濤怒浪。萬流曲折。以至輕波細溜。於一筆自分淺深之勢。甚佳。古今  
無及。

裴文睨。開封人。仁宗朝翰林待詔。工畫水牛。骨氣老重。劄渲謹密。亦一代佳手。然形似。乏古意。不足也。  
龍章。字公絢。京兆人。性淳靜好古。居亦冠帶。善畫虎兔。亦工道釋。尤長於裝染。

馮清。陝郡閿鄉人。真宗時入圖畫院。善畫橐駝。兼工平畫。亦能畫火。

韓拙。字全翁。南陽人。善畫山水窠石。有山水純全集。行于世。

荀信。江南人。工畫龍水。真宗時翰林待詔。

吳懷。江南人。善畫龍水。

吳進。亦善龍水。

李用及。開封人。能畫馬。深得韓幹筆法。人多稱之。亦善鬼神。宗吳生。

張翼。一名鈴。幽國人。善畫蕃馬及人物。師趙光輔。得其筆法。但爲蕃族面目多類漢人。於體爲失。辛成。不知何許人。籍隸軍中。工畫虎。有精神氣骨。

陶裔。京兆鄠人。工畫花鳥。精於寫生。形製設色。與黃筌相近。太宗朝爲翰林待詔。馮進成。江南人。工畫犬兔。思慮精巧。尤善染澤。

解處中。江南人。爲南唐後主翰林司藝。俗呼爲解將軍。善畫雪竹。有冒寒之意。但間泊翎毛。頗虧形似耳。毋咸之。江南人。善畫雞毛。色明潤。瞻視清爽。大有生意。

傅文用。開封人。工畫花鳥。有黃筌之風。特精野雉鶉鵲。能辨四時毛采。李茂。不知何許人。善畫人物。清麗可愛。

夏侯延祐。字景休。蜀人。工畫花鳥。師黃筌。粗得其要。官至圖畫院藝學。劉文惠。不知何許人。善畫花鳥。傅采雖勤。而氣格傷懦。



王友字仲益。漢州人。師趙昌。畫花果。不由筆墨。專尙設色。得其芳豔之意。比之於昌。終乏潤澤之妙。道士牛戩。字受禱。河內人。工畫翎毛。多信筆。寫寒鵲野雉鳩子。佳甚。但柘棘不甚精高。然筆墨粗豪縱放。亦不俗。師劉永年。

李雄。北海人。工畫佛道。偏長鬼神。罕有倫比。

蔡潤。建康人。善畫舟船及江河水勢。太宗朝授圖畫院待詔。

呂拙。開封人。工畫樓觀。太宗營玉清宮。拙畫鬱羅蕭臺樣。稱旨。授翰林待詔。不就。願爲本宮道士。仍得賜紫。拙畫屋木絕妙。又能映帶池塘。但人物傷繁耳。

劉文通。開封人。善畫樓臺。眞宗朝入畫院爲藝學。

宋澥。字則未。開長安人。湜之弟。司封道之從祖。高潔不仕。善畫山水林石。

隱士趙雲子。善畫道像。於青城文人觀畫。諸仙奇絕。

袁仁厚。師李文才。

郝處。江南人。工畫佛道鬼神。兼長寫貌。

顧洪祝。不知何許人。工畫人物。

高懷節。文進長子。太宗朝爲翰林待詔。頗有父風。兼長屋木。

童仁益。字友賢。蜀人。工畫人物尊像。出自天資。不由師訓。筆力勁健。類孫知微。

龍章。京兆機陽人。工畫道釋人物。兼工傳寫。尤善畫虎子淵。有父風。

鍾文秀開封人爲翰林待詔工畫道釋山水學關仝田景慶陽人工畫人物有奇思

李元濟太原人工畫道釋人物精於吳筆

王易鄜州人亦工佛道人物學隣元濟

陳坦晉陽人工畫道釋人物其畫田家固爲獨步

張宗古工山水

道士李八師亡其名邛州依政人工畫道門尊像

劉道士亡其名建康人工畫佛道鬼神落筆逾怪尤善山水師董源與巨然同時畫亦同但劉畫道士在

左巨然則以僧在左以此爲別耳

丘訥河南雒陽人工畫山水體近許道寧筆氣不逮而用墨過之

郝銳不知何許人工畫山水

梁忠信開封人仁宗朝爲畫院祇候工畫山水體近高克明而筆墨差嫩又寺宇過盛棧道兼繁

李宗成鄜時人工畫山水寒林學李成破墨潤媚取象幽奇林麓江皋尤爲盡善評者謂得成之似

董贇潁川長社人工畫山水寒林學志精勤豪鋒老硬但器類近俗格致非高

侯封邠人爲圖畫院學生工畫山水寒林師許道寧不能踐其老格然筆墨調潤自成一體亦郭熙之亞

符道隱長安人工畫山水寒林學無師法多從己見當其合作亦有可觀

僧擇仁。寓永嘉。善畫松。初集諸家所長而學之。後夢吞數百條龍。遂臻神妙。性嗜酒。每醉。揮墨於絹。紈。粉。堵之上。醒乃添補。千形萬狀。極於奇巧。

吳僧繼肇。工畫山水。與巨然同時。體亦相類。但峯巒稍薄怯也。

劉贊。蜀人。工畫花鳥。龍水。迹意兼美。

李符。襄陽人。工畫花。彷彿黃體。而丹青雅淡。別是一種風格。然於翎毛骨氣。有得失耳。

李懷袞。蜀人。工畫花鳥。學黃氏。與夏侯延祐不相上下。

李吉。開封人。嘗爲畫院藝學。工畫花鳥。學黃氏。

侯文慶。開封人。爲翰林待詔。工畫草蟲。及寫蔬菜。體尙精謹。殊乏生氣。

董祥。開封人。爲翰林待詔。工畫花木。有琉璃瓶中雜花折枝。人多愛之。

李祐。河內人。善畫花鳥。

建陽僧惠崇。工畫鵝雁鷺鷥。尤工小景。善爲寒汀遠渚。瀟灑虛曠之象。人所難到也。

卑顯。不知何許人。真宗朝爲翰林待詔。工畫馬。有韓幹之風。筆力勁健。

張戡。瓦橋人。工畫蕃馬。居近燕山。得北人形骨之妙。盡戎衣鞍勒之精。

邱士元。不知何許人。工畫水牛。精神形似外。特有趣。

胡九齡。絳人。工畫水牛。筆弱於裴文睨。而意瀟灑。愛作臨水倒影。牛人多稱之。

包貴。宣城人。善畫虎。名聞四遠。號老包也。

包鼎貴之子。雖從父訓。抑又次焉。

任從一開封人。仁宗朝爲翰林待詔。工畫龍水海魚。爲時推賞。

戚文秀。工畫水。筆力調暢。畫清濟灌河圖。一筆長五丈。自邊際起。通貫於波浪之間。與衆毫不失次序。超

騰回摺。畫鑿載常州佛寺後壁。有徐友畫水。亦名清濟貫河。中有一筆。尋其端末。長四十丈。筆法既老。波浪起伏。相對活動。愈看愈奇。

路衙推。亡其名。不知何許人。善畫魚。體致純古。

劉仲懷。山陰人。元祐徙居諸暨。善畫墨竹。筆法師文湖州。

蒲永昇。成都人。性嗜酒。放浪善畫水。東坡嘗得其畫。每觀之。陰風襲人。毛髮爲立。

何霸。不知何許人。工畫船水。其名尤著。

支選。不知何許人。仁宗朝爲畫院祇候。工畫太平車。又畫酒肆邊絞縛樓子。有分疏界畫之巧。兼工雜畫。

趙裔。不知何許人。工雜畫。兼長道釋人物。學朱繇。用筆少亞。而傅彩爲精。亦善花鳥。

高懷寶。懷節之弟。工畫花鳥草蟲蔬果。頗臻精妙。與兄懷節同爲畫院祇候。高氏自道興至二子。凡四世。皆以畫進。延賞於世。誠可佳矣。

鄧隱。梓州人。工佛像鬼神山水花鳥。

張敦禮。汭梁人。哲宗壻也。畫人物樹石。并做顧陸。筆法緊細。神采如生。贈太師。

程坦。善雜畫。松竹頗佳。人物甚俗。米元章謂能汗茶坊酒肆者。此論真是。

僧仲仁。會稽人。住衡州花光山。以墨暈作梅。如花影然。別成一家。所謂寫意者也。

趙叔盎。字伯充。宋宗室。善畫馬。

趙士暉。字明發。宋宗室。讀書能文。兼工畫。有高軒過圖。

趙士衍。宋宗室。號花一相公。長於著色山水。意韻可喜。

趙士安。宋宗室。長於墨竹。不遵川派。好作筆竹。殊秀潤。

蘇軾。字子瞻。眉山人。高名大節。照映古今。復能留心墨戲。作墨竹。師文與可。枯木奇石。時出新意。木枝幹

虬屈無端。石皴老硬。大抵寫意。不求形似。

米芾。字元章。天資高邁。書法入神。作畫喜寫古賢像。山水。其源出董源。天真發露。怪怪奇奇。枯木松石。自

有奇思。

晁補之。字無咎。濟北人。善畫山水。官至知泗州事。

劉涇。字巨濟。簡州人。米元章書畫友也。善作林石槎竹。竹以圈筆爲葉。筆墨狂逸。體製拔俗。極有奇思。官

至職方郎中。

蘇過。字叔黨。東坡先生季子也。善作怪石聚篠。咄咄逼翁。又畫山水。遠水多紋。依崖多屋木。皆人跡絕處。

並以焦墨爲之。此出奇也。官至中山倅。

宋子房。字漢傑。鄭州滎陽人。少府監選之子。復古之姪。善畫山水。不古不今。稍出新意。官至正郎。

程堂。字公明。眉人。善畫墨竹。宗文湖州。好畫鳳尾竹。其梢極重。作回旋之勢。而枝葉不失向背。尤善寫園

蔬極佳。

范正夫字子立。潁昌人。文正公諸孫。德孺之子。長於水墨雜畫。標格清秀。有訪戴圖。鶴令圖。竹石圖。知鳳翔。還鄉。死於兵。

顏博文。字持約。德州人。長於水墨。作人物。筆法位置。如李伯時。但氣韻差短耳。又善墨花。

任誼。字才仲。宋復古之甥。畫山水。髣髴龍眠。清潤可喜。亦能畫花。隸書學蔡中郎。官澧州通判。李石字知幾。資州人。醉吟之餘。時作小筆。風調遠俗。官至成都。倅。

杭士林。生作江湖景。蘆雁水禽。氣格清絕。米元章謂可並徐熙。在艾宣張涇之右。南唐無此畫。寶覺大師。畫翎毛。蘆雁。甚不俗。

李甲。字景元。華亭人。作逸筆翎毛。有意外趣。木不佳。

周純。字忘機。成都華陽人。後久留荆楚。亦自稱楚人。畫山水。師李思訓。衣冠師顧愷之。佛像師李伯時。尤善畫花鳥。松竹牛馬。一一清絕。

高燾。字公廣。沔州人。自號三樂居士。作小景。自成一家。清思可人。一洗工氣。眠鴨浮雁。枯槿衰楊。最爲珍絕。篆隸飛白。一一造妙。

僧德正。信州人。徐競明叔之兄。徐林稗山之弟。登科爲平江教官。棄而爲僧。能畫山水人物。種種清絕。專師李伯時。

劉明復。善畫山水。師李成。官至直龍圖閣。



蔣長源字永仲作著色山水頂似荆浩身似李成葉取眞松爲之如靈鼠尾大有生意石不甚工作凌霄花纏松亦佳作

鄢陵王主簿原注亡其名長於花鳥東坡曾題其折枝花

李世南字唐臣安肅人善畫山水寒林官至大理丞

趙宗閱畫墨竹山谷嘗題之官至尙書郎

薛判官不知其名善墨竹

倪濤字巨濟宣和間爲都司善畫墨戲草蟲

文助字安國善畫山水官至太府寺丞

劉延世字王孟新喻人公是先生敝之猶子善寫墨竹築堂曰抱瓮爲講書之所

王冲隱名持字正叔長安人畫禽鳥竹棘師崔白

靳東發字茂遠工畫人物集古今諫諍百事爲圖號百諫圖官至州倅其子詠字少張亦善山水

李頎字粹老嘗畫山并詩上東坡東坡次其韻

陳直躬高郵人工畫禽雁

朱象先字景初松陵人馳名元符間善畫

張無惑山人也善山水

何充姑蘇人能寫貌擅藝東南無出其右

眉山老書生。不得其名。作七才子入關圖。山谷謂人物各有意態。以爲趙雲子之苗裔。摹寫物象漸密。而放浪閒遠。則不逮也。

雍秀才。不知何許人。善畫蟲魚。

章友直。字伯益。善畫龜蛇。頗有生意。

黃斌老。潼川安泰人。文湖州妻姪。登科。任戎倅。善畫竹。

黃彝。字子舟。斌老弟。善畫竹。

劉明仲。善作竹。

黃與迪。善墨竹。

楊吉老。字克一。張文潛之甥。善畫竹。

成子。不得其名。善畫山水。

張遠。字行之。太原榆次人。隱居山間。善畫山水。

張明遠之姪。亦擅名山水。

王元通。滄州人。工山水。師李成。爲人豪逸。每畫。竟大呼奇奇數聲。乃得意筆也。

閻丘秀才。江南人。不記名。長於畫水。無所宗師。自成一家。

喬仲常。河中人。工雜畫人物。師李伯時。

孔去非。汝州人。寧極先生之後。長於小筆。清雅可玩。尤工草蟲。蠶、蝶、竹、雀。甚可觀。

劉松老字榮祖。巨濟之子。書學米元章。畫師東坡。

王逸民永康導江人。初爲僧。名紹祖。詩畫俱效周忘機。而氣韻縣絕也。學山谷草書亦佳。

馮久照字明遠。汾州人。後寓蜀。畫山初頗繁冗。後因郭熙之孫游卿來爲太守。盡以家學傳之。其格遂一變。

劉履中字坦然。汴人也。善畫人物。筆勢雄特。仙佛亦其所長。但故事人物未脫工氣。

劉銓字真孺。成都人。喜畫山水。尤工佛像。描墨成染。與李道明無異。而清勁過之。

季皓字雲叟。唐臣孫也。避亂入蜀。畫山林。

張嗣昌字起之。與可外孫。筆法旣有所授。每作竹。乘醉大呼。然後落筆。

婦人盧氏。許州人。能作墨竹。梅聖俞嘗賦詩題之。

任粹才仲之姪。能作著色山水。

雍巘字幼山。興元人。善山水。作岩崖枯木雲氣。畫墨梅尤佳。

牟谷不知何許人。善傳寫。能正面真。真宗朝授翰林待詔。

尹質蜀人工傳寫。兼長雜畫。

歐陽鬢開封人工傳寫。

僧維真嘉禾人。苗本有工字。傳寫。

僧元靄蜀人。太宗朝供奉。工寫貌。

蔡肇字天啓丹陽人登進士第仕至從官畫山水人物尤好作枯槎老樹怪石奔湍頗多古意

程若筠宣政間太乙宮道士善作古木老棘殊峭勁兼寫花竹翎毛疏渲頗工花則每樹只作數花亦頗

清雅

道士蕭太虛畫墨竹墨梅松柏雜樹每畫須用濃墨作枝梢其上榦暈梅花有山林清幽氣象題名作陰  
文篆字於石上如石刻然自作一格清奇可愛

甘風子關右人佯狂好酒畫人物以細筆作頭面動以十數然後放筆如草書法以就全體頃刻而成妙  
合自然多畫列仙之流

王顯道漢州人本餅師後專心畫龍格製雄壯

成宗道長安人工人物兼善刻石臨摹吳筆上石真迹細如絲髮不失精神體段宛然如畫

三朵花房州人不知姓名嘗戴三朵花故名之能自寫真

眉山道士羅勝先自號雲和山長善山水有古意

李時擇遂寧人見武洞清所畫羅漢豁然曉解得其筆法兵亂歸蜀卽以畫名

楊大明字民瞻號至樂子善龜蛇

僧真慧杭人畫山水佛像近世佳品翎毛墨竹有江南氣象

惠洪覺範能畫梅竹用皂子膠畫梅於生縑扇上燈月下宛然影也筆力於枝梗極逾健

道宏峨眉人姓楊受業於雲頂山相貌枯瘁善畫山水佛像晚年似有所遇遂冠巾改號龍岩隱者

妙喜師長寫貌。

道臻嘉州石洞僧能墨竹。

吳僧法能工畫羅漢。

祖鑒成都僧畫觀音。

智平成都清涼院僧善畫觀音。

虛己成都相林院僧善山水。

覺心字虛靜嘉州人善畫草蟲後工山水。

智源字子豐遂寧人工雜畫尤長於人物山水。

智永成都僧工小景長於傳模宛然亂真。

真休漢嘉僧善模搨人物如真。

宋莊字臨仲漢傑之孫其山水氣韻得家法但筆未老耳。

賈公傑字千里昌期孫炎之子學馬賁而標格過之又作佛像極精細衣縷皆描金而不俗。

郭道卿字仲常游卿字季熊熙之諸孫皆爲郡守頗有家學善畫馬其筆法真季孟也。

高大亨字通叟長於山水。

錢端回戚里人善寫平遠。

李景孟字仲淳善畫馬尤於圖畫鑒別精確。

邵少微字叔才澤民子工畫石竹禽獸筆墨草具而有餘意

李元崇字季姚文正公裔無盡甥畫山水師范寬清潤可喜官至縣令

葉漢卿

李漢舉

楊道孚

薛彥晦

王佐才

雷殿直已上俱善墨竹

道士田白兗州人畫竹石學東坡

李蕃字元翰成都人才元之曾孫能畫道釋人物全學范瓊但不喜布色

崇德郡君李氏王之才妻公擇之妹能臨松竹木石見本卽爲之卒難辨

臺亨夏縣人元豐中修景靈宮調天下畫工亨名第一待詔翰林固辭歸養

和國夫人王氏宗室仲觀室善字畫兼長翎毛

張嗣昌母文湖州第三女嘗臨湖州黃樓障暮年以手訣傳嗣昌

章友直女名煎能如其父篆筆畫棋盤

任才仲妾豔豔有絕色善著色山水



桐廬方氏。陳晦叔子婦。作梅竹。極清遠。

魏觀察。宣政宦寺。善墨竹。

劉國用。漢州人。工畫羅漢。

陳自然。工畫佛。兼長水禽。

于氏。不記名。河東人。能畫佛道鬼神。

雷宗道。商州人。工雜畫。尤長於佛像山水。山水似郭熙。

能成甫。工畫佛像山水。官至縣令。

費宗道。蔡州人。畫佛道鬼神。

吉祥。平陽人。工佛道。筆墨輕清。山水亦佳。

司馬寇。汝州人。佛像鬼神人物種種能之。宣和間。稱第一手。

楊傑。閬州人。長於鬼神。每下筆。先畫手足。然後三兩筆成就全體。

張通。鄜州人。長於仙佛。

李士雲。金陵人。

程懷立。南郡人。

朱漸。開封人。

朱宗翼。

徐確俱善寫照。

劉宗道開封人。作照盆孩兒。以手指水影。影亦相指。形影自分。

杜孩兒開封人。在宣政間。其筆盛行。

王可訓京西人。元豐待詔。工山水。自成一家。

池州匠畫秋浦九華。粗有清趣。師董元。

李明善山水。

蔡規建昌人。善山水。

廉至誠不知何許人。善畫山水。意匠精深。筆力高古。補將仕郎。

賀真延安人。出自戎籍。畫人物山水。古木怪松。得郭熙筆法。

甯濤華陰敷水人。師范寬。多作關右風景。其巧過寬。而渾厚藏蓄不及。蓋樓觀人物。失於太顯。

甯久中濤子也。工山水人物。得出俗之態。筆意不減其父。但多平遠道路之景。不起峯頂耳。

高洵開封人。工山水。師高克明。尤長於湖石。晚年復師范寬。花鳥師程若筠。

馮曠河內人。工山水。體製不類前人。自成一家。筆墨蒼老。峯巒秀潤。名馳熙寧間。

何淵畫院人。專師高克明。往往逼真。然失之繁碎。

劉翼耀州人。呼爲劉評事。學范寬。而有自得處。

宋處邢州人。善畫山水。曾模郭熙滿溪春溜圖。

李遠。青州人。學李成。氣象深遠。馳名崇觀間。

郝士安。太原榆次人。張遠弟子。事師甚敬。常執杖倚立左右。

張舉。懷州人。工山水。尤長澗瀑。

趙林。字子安。懷州人。善山水。步驟李成。

郭鐵子。榆次人。學李成。善鍛鐵。作方響。故號之。

老成。洺州人。工雜畫。尤長山水。性沉靜。筆法謹細。如其人。

李希成。華州人。慕李成。遂命之。初入畫院。自晦以妨忌嫉。比已補官。始出所長。

田和。陝州人。學李成。意韻深遠。筆墨精簡。

蒙亨。華州人。明苗本。無人字。學甯濤。山水得典型也。

戰惠淳。畫院人。能著色山水。人物甚小。青衫白袴。烏巾黃履。不遺毫髮。又作紅花綠柳。清江碧岫。一扇之

間。有十里光景。真可愛也。

和成忠。京西人。宣和待詔。學李成山水。筆墨溫潤。病在烟雲太多爾。

劉仲先。成都人。善山水。

郝孝隆。太原人。師李成。

瀟湘劉堅。師范寬。頗柔媚。樓閣人物。種種皆工。多作小圖。無豪放之氣。時作竹石。甚有風致。畫院學生。尹白。汴人。專工墨花。習花光梅。扶疏縹緲。

李覺京師人字民先長於山水醉後能潑墨作圖曲盡自然之態。

張涇姑蘇人米元章稱其翎毛蘆雁不俗。

陳常江南人以飛白筆作樹石有清逸意折枝花亦以逸筆一抹爲枝以色亂點花欲奪造化妙作也。人物不工。

張希顏漢州人初名適善畫花師趙昌大觀初累進畫花得旨補畫學諭後變從院體官至蜀州推官。

任源漢州人少隸軍籍師張希顏盡得其法。

費道寧懷安人善畫花多作交枝。

楊寵成都人善畫花可亞費道寧。

楊祁彭州人善花鳥又工畫雞。

李猷河內人長於鷹鶴精神態度曲盡其妙。

韓若拙洛人善翎毛政和間兩京推爲絕筆。

孟應之不知何許人精於翎毛。

老麻關中人熙寧間以花鳥稱非蜀之居禮也。

宣亨汴人精於花鳥。

胡奇長安人長於蘆雁。

鮑洵京西人工花鳥弟洋亦善其技。

盧章。汴人。工畫花鳥。多畫禁中佛像。

劉益。字益之。汴人。工花禽。宣和間與富燮供御。多取內殿珍禽。諦玩以爲法。其描染類郭乾暉。尤長小景。靖康之難。流落嶺表。多畫山果野禽。故人呼爲劉村子樁。世其業。

富燮。汴人。宣和間與劉益同供御。布景運思。過於益。

夏奕。不知何許人。工翎毛。畫鷓鴣。作對而皆雄。蓋求脫俗也。

田逸民。濟南人。長於墨竹。極佳。入宣和畫院。祇應。

李誕。河間人。多畫藁竹。筍籜鞭節。色色畢具。此宣和體也。

張舜民。字芸叟。號浮休居士。嗜畫山水。作秋景。自賦詩云。我有故山常自寫。免教魂夢落天涯。畫上有浮休二字。可辨。紹聖貶筠州。紹興初追復直學士。

李遵易。不知何許人。善畫魚。

侯宗古。善畫龍。

郝七。不知名。亦善畫龍。比宗古有筆力。

陳皋。漢州人。長於蕃馬。頗盡胡態。張戡之甥也。

路皋。并州人。畫橐駝。兼長鬼神。

龔吉。不知何許人。長於兔。人所不及。

吳九州。燕人。善畫鹿。曲盡其態。

周照專畫狗。

郝章汾州人。長於人馬。

老侯瀘州人。善畫猿鹿。兼長花鳥。頗有生意。

趙樓臺。不知名。相州人。善畫屋宇。

郭待詔。趙州人。善界畫。

任安。汴人。工界畫。每與賀真合手作圖軸。

陶續。金陵人。畫花果。尤工蔬菜。

薛志。字子尚。長於水墨。雜畫翎毛。不逮花果。不善設色。

馬賁。河中人。宣和待詔。工畫花鳥佛像。人物山水。尤長於小景。

周會。不知何許人。與馬賁同時。差高於賁。尤長山水。

段吉先。不知何許人。晁無咎曾題其小景。

李達。汴人。好作沙汀遠岸。含畜不盡意。

劉浩。居華陰。愛作雪驢水磨。故事人物。多布皴。景致意象幽遠。筆法輕清。

楊威。絳州人。工畫村田樂。

郭思。熙之子。亦善雜畫。崇觀中。應制畫山海經圖。其中瑞馬。頗得曹韓遺法。妙頤真。南陽人。畫墨鬼。暈淡有致。山谷嘗跋之。



黃宗道。宣和畫院待詔。工畫人物蕃馬。師胡環東丹。王世論胡畫馬得肉。東丹得骨。宗道二法俱備。畫上寫京師黃宗道。

道士林靈素。善作墨竹。湖州元妙觀。有石刻一枝尚存。

陳珍。蜀人。畫花竹學徐熙。

何澄。長沙人。工畫神佛。因其祖曾收武洞清畫本甚多。觀習久之。得其遺意。然後落筆。自幼自長。無日不

作。老而愈勤。傅染簡淨。不假重色。

賈行恭。北地人。善寫道釋鬼神。尤長於巨人大馬。

郭信。京師人。補畫院賜緋待詔。或云熙之裔。工畫道釋。落筆細明。苗本作納。秀亦善山水。得李成惜墨法。

氣象清曠。其皴搶又類賀真。亦一代奇筆也。

呂漸。洛陽人。工畫佛像。威儀雄偉。尤善山水窠石。深得位置。

周與權。長沙人。工畫佛像。筆法勁爽。

田松。舞水人。工畫道釋人物。筆法勁健。傅染輕淡。

王藻。工畫牛馬。

趙宣。用飛白筆作人物。宣和元年。試中畫人。

洪子範。東京人。工人物山水。

楊安道。九江人。學范寬山水。用焦墨太重耳。

戴琬京師人宣政間在翰林恩寵特異工翎毛花竹嘗得入閣供奉後因求者甚衆徽宗聞之封其臂不令私畫故傳世者鮮

王登仕中原人畫佛道像別具一體衣帶飄薄

趙師北地人宣和畫院名手工道釋人物

張武翼名諒工道釋人物其蹟爲畫家格範今世稱院體者是也二子永年康年永年後事劉益學花鳥康年有父風未中年而卒

張戢不知何許人志尙清虛每以琴自娛工畫山水應奉翰林日徽宗遣其乘舟往觀山水之勝作八景圖未及進上而禍作遂留滯湘中

傅逸京師人工畫人物師張諒善描染

王晟景陵人師張諒長而變法尤善山水初學張戢後亦變體

盧道寧少事張諒工畫神佛尤精傅染作山水師賀眞多作寒林古木用墨恬淡  
丁晞顏字令子書畫皆精全似李伯時嘗有所畫孝經

卷四

宋南渡後

高宗書畫皆妙作人物山水竹石自有天成之趣上用乾卦印晚居北內多用太上皇帝之寶德壽殿寶

御府圖

趙士遵高宗之叔封漢王善人物山水著色景頗似李昭道紹興間一時婦女服飾及琵琶阮面所作多以小景山水實始於士遵然其筆超俗特一時倣倣宮中之化非專爲此等作也

趙子澄字處廉宋宗室嘗作濺瀑欲動屋筆力極適壯

景獻太子諱詢燕王德昭九世孫希懌之子善畫竹石其子迺裕孝宗之弟也官至保寧軍節度使臨川郡王諡莊靖書學高孝兩朝筆法尤工墨竹喜作挂屏長竿枝梢旁出如簷底乍見濃墨獵獵頗具掀舞之態題詩其上用善雅堂印

趙師宰字牧之居天台臨海登真西山門學墨竹得徐熙之妙見稱於人號隨菴

趙與懃居處州青田正惠公希暉之子嘉熙間知臨安府以右文殿修撰奉祠與兄與憲以治辦並稱於時臨模古畫莫能辨善作墨竹號蘭坡

趙伯駒字千里善畫山水花禽竹石尤長於人物精神清潤能別狀貌使人望而知其詳也高宗極愛重之仕至浙東兵馬鈐轄

趙伯駒字希遠千里弟善畫山水人物尤長於花禽傳染輕盈頓有生意嘗畫姑蘇天慶觀樣進呈孝宗書其上令依元樣建造今元妙觀是也仕至觀察使子師瓘官至八座

趙孟堅字子固號彝齋居士居海鹽廣陳鎮寶慶二年進士修雅博識人比米南宮東西遊適一舟橫陳僅留一榻偃息地餘皆所挾雅玩之物意到左右取之吟弄忘寢食過者望而知爲趙子固書畫船也

善水墨。白描水仙花梅蘭山礬竹石。清而不凡。秀而雅淡。有梅譜傳世。官至朝散大夫嚴州守。

趙孟淳字子真。子固之弟。繼秀安僖王後。自號竹所。墨竹可觀。

趙孟奎字文耀。太師忠惠公與篤之子。號春谷。畫竹石蘭蕙。官至祕閣修撰。

吳琚字居父。憲聖皇后姪。太寧郡王益之子。性寡嗜好。日臨古帖。以自娛。字類米南宮。以詞翰被遇。孝宗。非它戚屬比。嘗作墨竹坡石。品不俗。自號雲壑。歷尙書郎部使者。直學士。慶元年間。以鎮安節度使留。守建康。遷少保。諡忠惠。世稱吳七郡王。汴人。

楊瓚字繼翁。恭仁皇后姪孫。太師次山之孫。度宗朝。女爲淑妃。官列卿。好古博雅。善琴。倚調製曲。有紫霞洞譜傳世。時作墨竹。自號守齋。

楊鎮字子仁。嚴陵人。自號中齋。節度使蕃孫之子。尙理宗周漢國公主。平居少飲。喜觀圖史。書學張卽之。工丹青墨竹。在鄆王員大夫間。蘊藉可觀。凡畫賦詩其上。卷軸印記。清致異常。用駙馬都尉印。謝堂號恕齋。善畫竹梅蘭松石窠木。清雅可愛。官至樞密使。

米友仁字元暉。元章之子。能傳家學。作山水。清致可掬。略變其父所爲。成一家法。煙雲變滅。林泉點綴。草草而成。不失天真。意在筆先。正是古人作畫妙處。每自題其畫曰墨戲。晚年多於紙上作之。

廉布字宣仲。山陽人。自號射澤老農。畫山水。尤工枯木蘖竹奇石。松柏本學東坡。青出於藍。官至武學博士。以張邦昌壻。負才不得用。子孚亦有父風。

王清叔開封人。乾道間進士。號醒菴。學廉宣仲畫。枯木竹石。臨做逼真。但筆墨麓惡。少生意耳。官至太府

卿世稱王經略之名特著。

揚補之字無咎號逃禪老人南昌人也。祖漢子雲其書姓從才不從木。高宗朝以不直秦檜累徵不起。又自號清夷長者。水墨人物學李伯時。梅竹松石水仙筆法清淡閒野爲世一絕。

韓侂胄嘉泰間爲平章太師善作水墨竹石所畫大葉琅玕自稱曰太師竹卷軸上用安陽開國印記。

俞澂字子清吳興人作竹石得文蘇二公遺意清潤可愛。光宗朝任大理少卿寶謨閣待制致仕號且軒。晁說之字以道號景迂喜作帶景秋色蘆雁世惟知崔白不知以道尤妙。官至侍讀學士。

李昭字晉傑鄆城人李文靖之曾孫山水學范寬又善畫花長於墨竹自云他人以蕭疎爲能余以重密爲巧吾一派不讓文湖州也尤精篆學三墳記。

魏燮字彥密北人長於水墨梅竹雜畫工詩高宗見而喜之除浙西參議。

連鰲字仲舉自號石臺居士精長短句工畫魚幾於徐白紹興年間人。

王利用字賓王潼川人舉進士善畫山水長於人物精謹而已亦能書高宗頗愛之官至夔憲。朱敦儒字希真善畫山水官至浙東憲。

江參字貫道江南人形貌清臞嗜香茶以爲生居雪川深得湖天之景平遠曠蕩盡在方寸長於山水師董源巨然趙叔問居三衢治園築館取楚詞之言名之曰崇蘭嘗與陳簡齋程致道從容其中命貫道

爲之圖又令畫史各繪像其上乃賦詩焉。

鄭希古河東人長於平畫每出新意輒過人初未甚精紹興初遇郝章於閩州盡得其法。

楊簡字敬仲。慶元慈溪人。師於陸象山。喜作墨竹。士大夫求者。欣然落筆。有石本橫枝傳世。理宗朝。官至寶謨閣學士。諡文元。人尊稱曰慈湖先生。

王會字元叟。工花鳥。頗拘院體。枝葉爪羽窮極微細。乾道間。官朝請大夫。

馬和之。錢塘人。紹興中登第。善畫人物佛像。山水傲吳裝。筆法飄逸。務去華藻。自成一家。高孝兩朝。深重其畫。每書毛詩三百篇。令和之圖寫。官至兵部侍郎。

陳容字公儲。自號所翁。福堂人。端平二年進士。歷郡文學。倅臨江。入爲國子監主簿。出守莆田。賈秋壑招致賓幙。無何醉輒狎侮之。賈不爲忤。詩文豪壯。善畫龍。得變化之意。潑墨成雲。噴水成霧。醉餘大叫。脫巾濡墨。信手塗抹。然後以筆成之。或全體。或一臂一首。隱約而不可名狀者。曾不經意而得。皆神妙。時爲松竹。云作柳。誠懸墨竹。豈卽鐵鉤鎖之法歟。寶祐間。名重一時。垂老筆力簡易精妙。絳色者可並董羽。往往贗本亦託以傳。

單煒字炳文。好古博雅。與江白石爲友。善書。喜寫竹。

張端衡。鎮江人。畫木石有名。以進士調句容縣尉。

丁權字子卿。越人。善畫竹。自述竹譜。

陳珩字用行。號此山所翁。弟亦善龍水。時亦作水墨枯荷折葦。蟲魚蟹鵲及墨竹。極有生意。仕朝請郎。

艾淑字景孟。建寧人。號竹坡。早游太學。善畫竹。與陳所翁同舍。畫龍俱得名。時稱六館二妙。仕爲寧波軍節度判官。時又有茅汝元舉進士。號靜齋。善墨梅。人以艾竹茅梅爲稱。



林泳。興化人。霽齋。林希逸之子。善墨竹。自號弓寮。  
魯之茂。海鹽當湖人。號雪村。畫梅竹。寧宗朝仕爲郎。

王柏。字會之。號魯齋。金華人。丞相淮之族。事朱氏門人楊船山。又從何北山。不求聞達。德祐間將起之。俄卒。梅竹之妙。不妄與人。世罕知之。

湯正仲。字叔雅。江西人。揚補之甥。後居黃岩。號間菴。開禧年貴仕。善畫梅竹松石。清雅如傅粉之色。水仙蘭亦佳。大抵宗補之。別出新意。用湯氏叔雅印。

畢良史。字少董。紹興間進士。善作窠木竹石雲龍。能寫唐人小楷。書畫俱妙。

陳虞之。字雲翁。號止所。溫州人。咸淳初進士。深於易。作墨竹。每見竹折小枝。就日影視之。皆欲精到。歷官揚州教授。終奉議郎。

馬宋英。溫州人。放達能詩。父歿。家資日削。至錢唐游淨慈寺。寫古松於壁。題云。磨出一錠兩錠墨。掃出千年萬年樹。月明烏鵲誤飛來。踏枝不著空歸去。丁大全丞相賞其詩畫。急命索之。人忌其能。闕不令出。卒不遇。此誠詩識。作墨梅竹俱妙。

毛信卿。失其名。溫州人。屢試無成。放意詩酒。畫竹自給。號箕山。杭人得其片幅。轉售於市。輒爭取之。自言大竹畫形。小竹畫意。得法於趙牧之。

裴叔永。字德游。號靜菴居士。其先汴人。徙錢唐。財雄鄉里。建炎間裴節使之孫也。與楊中齋駙馬爲書畫友。善寫蘭竹窠木怪石。畫上用嘉善堂印。

水邱覽雲杭州臨安人。效米元暉作山水。逼真。又善寫貌。

楊季衡洪都人。補之姪。畫墨梅得家法。又能作水墨翎毛。又有劉夢良亦鄉里親黨。俱寫墨梅。

僧超然不知何許人。善作山水。其峯巒礬頭。酷似郭熙。至於屋宇林石坡灘水口筆法孱弱。與巨然殊不

相類。今人多以巨然超然連稱。莫曉所謂。

武道光錢唐人。東太乙宮道士。善潛補六朝古名畫。又能作花鳥窠木竹石。

闕生不知何許人。作古木雪景梅花寒鴉凍鵲。深得其意。

許龍湫江南術士。山水師米元暉。用筆自成一家。設色清潤。

左幼山原注一作幻山錢唐景靈宮道士。善花鳥山水人物。師閻次平。

葛長庚閩人。自號曰玉蟾。嗜酒苦吟。善草書。畫竹石遊湘潭。與葉天谷皆言得道。鄂州城隍廟壁林竹是

其真跡。嘗畫祖師張平叔薛道光及自己像。

丁野堂名未詳。住廬山清虛觀。善畫梅竹。理宗因召見。問曰。卿所畫者。恐非宮梅。對曰。臣所見者。江路野

梅耳。遂號野堂。

歐陽楚翁字無塵。龍虎山道士。善畫山水窠木竹石水墨梅花四時之景。尤工畫龍。其子雲友亦臻其妙。

僧梵隆字茂宗。號無住。吳興人。善白描人物山水。師李伯時。高宗極喜其畫。每見輒品題之。然氣韻筆法

皆不逮龍眠。

僧法常號牧溪。喜畫龍虎猿鶴蘆雁山水樹石人物。皆隨筆點墨而成。意思簡當。不費妝飾。但麤惡無古

法誠非雅玩。

僧月蓬不知何許人。貌古怪。亦不知止宿何地。畫觀音佛像。羅漢天王。得古人體韻。其畫不妄與人。罕有之。

僧靜賓號白雲。善作異松怪石。如龍騰虎踞。上寫草字。寺院多收。

瑩玉礪。西湖淨慈寺僧。師惠崇。畫山水。

僧蘿窗。不知名。居西湖六通寺。與牧溪畫意相侔。

僧子溫。字仲言。號日觀。作水墨葡萄。自成一家人。莫能測。又號知歸子。

僧若芬。字仲石。婺州曹氏子。爲上竺寺書記。模寫雲山。以寓意。求者漸衆。因謂世間宜假不宜真。如錢唐

八月潮。西湖雪後諸峯。極天下偉觀。二三子當面錯過。卻求玩道人數點殘墨。何邪。歸老家山。古澗側。流蒼壁間。占勝作亭。扁曰玉澗。因以爲號。又建閣對芙蓉峯。號芙蓉峯主。嘗自題畫竹云。不是老僧親寫。曉來誰報平安。

僧仁濟。字澤翁。姓童氏。玉澗之甥。書學東坡。墨竹學俞子清。梅學揚補之。自謂用心四十年。作花圈稍圓

耳。山水亦得意。

僧圓悟。閩人。號枯崖。能詩。喜作竹石。

僧慧舟。號一山叟。天台人。居西湖長慶寺。能詩。作小蘂竹。或二三竿。或百十成林。不見其重複冗雜。

僧太虛。江西人。作竹學鄆王楷。

李唐字希古河陽三城人徽宗朝會補入畫院建炎間太尉邵淵薦之奉旨授成忠郎畫院待詔賜金帶時年近八十善畫山水人物筆意不凡尤工畫牛高宗雅愛之嘗題長夏江村卷上云李唐可比唐李思訓

劉宗古汴京人宣和間待詔成忠郎畫人物山水佛像靖康亂流落江左紹興二年進車輅式稱旨復舊職除題舉車輅院事其畫人物長於傅明苗本作成染不藉脂粉水墨輕成但筆致纖弱耳

馬公顯弟世榮興祖子俱善花禽人物山水得自家傳紹興間授承務郎畫院待詔賜金帶世榮二子長曰達次曰遠世其家學

楊士賢宣和待詔紹興間至錢唐復舊職賜金帶工畫山水人物師郭熙多作小景山水林木勁挺似亦可取峯石水口雄偉之筆遠不逮熙

李迪河陽人宣和蒞職畫院授成忠郎紹興間復職畫院副使賜金帶歷事孝光朝工畫花鳥竹石頗有生意山水小景不逮

李安忠居宣和畫院歷官成忠郎紹興間復職畫院賜金帶工畫花鳥走獸差高於迪尤工捉勒山水平

蘇漢臣開封人宣和畫院待詔師劉宗古工畫釋道人物臻妙尤善嬰兒紹興間復官孝宗隆興初畫佛像稱旨補承信郎其子焯能世其學隆興畫院待詔

朱銳河北人宣和畫院待詔紹興間復職授迪功郎賜金帶工畫山水人物師王維尤好寫騾網雪獵盤

車等圖。形容布置。曲盡其妙。筆法類張敦禮。

李端。汴人。宣和畫院待詔。紹興間復官。賜金帶。作梨花鳩子得法。

張浹。宣和畫院待詔。畫人物山水。師郭熙。紹興間復官。賜金帶。

顧亮。宣和待詔。師郭熙。畫山水人物。與張浹同流。落江左宮觀寺院。畫壁湖口。紹興間復職。賜金帶。

胡舜臣。張著。俱學郭熙山水。與張浹顧亮同門。各得熙之一偏。亮能作大幅巨軸。浹喜布置。著畫重山疊

巘。頗繁冗。舜臣謹密。雖皆不逮其師。然後人亦無及之者。

李從訓。宣和待詔。紹興間復官。補承直郎。賜金帶。工畫道釋人物花鳥。位置不凡。傅采精妙。高出流輩。

閻仲宣。和百王宮待詔。工畫人物絳色山水。尤工畫牛。紹興間復官。補承直郎。畫院待詔。賜金帶。筆法頗

巖俗。

閻次平。弟次于。皆仲之子。能世其學而過之。畫山水人物。工於畫牛。次平彷彿李唐。而跡不逮意。次于又

次之。孝宗隆興初。進畫圖稱旨。補次平將仕郎。次于承務郎。畫院祇候。賜金帶。

吳炳。毗陵人。工畫花鳥。寫生折枝。可奪造化。采繪精緻富麗。光宗李后多愛其畫。恩賚甚厚。紹興間畫院

待詔。賜金帶。

林椿。錢唐人。工畫花鳥翎毛。師趙昌。傅色輕淡。深得造化之妙。淳熙年畫院待詔。賜金帶。

趙彥。汴人。居臨安。不入畫院。開市鋪。畫扇得名。作人物山水。細碎深遠。

蕭照。漢澤人。頗知書。亦善畫。靖康中流入太行。爲盜。一日掠至李唐。檢其行囊。不過粉奩畫筆而已。叩知

其姓氏。照雅聞唐名。卽辭賊隨唐南渡。得以親炙。唐感其生全之恩。盡以所能授之。紹興中補迪功郎。畫院待詔。賜金帶。其畫山水人物。異松怪石。蒼涼古野。惜用墨太多。書名於樹石間。

周儀。宣和畫院待詔。善畫人物。謹守法度。清秀入格。承應摹唐畫。有可觀。紹興年復官。賜金帶。

劉松年。錢唐人。居清波門。俗呼爲暗門劉。淳熙畫院學生。紹興年待詔。師張敦禮。工畫人物山水。神氣精妙。名過於師。寧宗朝進耕織圖。稱旨。賜金帶。院人中絕品也。

李嵩。錢唐人。少爲木工。頗遠繩墨。後爲李從訓養子。工畫人物道釋。得從訓遺意。尤長於界畫。光寧理三朝畫院待詔。

賈師古。汴人。善畫道釋人物。師李伯時。白描。紹興畫院祇候。其人物頗得閒逸自在之狀。

王訓成。山東人。爲人物山水。描寫粗惡。紹興畫院待詔。名餅儲王。當時上方所尙。蕭李之迹。故訓成不得志而死。

焦錫。宣和院人。紹興復爲畫院待詔。師石恪。畫人物。

馬興祖。河中人。賁之後。紹興間待詔。工花鳥雜畫。高宗每獲名踪卷軸。多令辨驗。

馬遠。興祖孫。世榮子。畫山水人物。花禽種種臻妙。院人中獨步也。光寧朝畫院待詔。

馬逵。遠兄。得家學之妙。畫山水人物。花果禽鳥。疏渲極工。毛羽燦然。飛鳴生動之態。逼真。殊過於遠。他皆不逮。

徐珂。蘇漢臣婿。學婦翁畫人物。得其遺意。頗能描寫。其傳染則不及。



梁楷。東平相義之後。善畫人物。山水。道釋鬼神。師賈師古。描寫飄逸。青過於藍。嘉泰年畫院待詔。賜金帶。楷不受。挂於院內。嗜酒自樂。號曰梁風子。院人見其精妙之筆。無不敬伏。但傳於世者皆草草。謂之減筆。

夏珪。字禹玉。錢唐人。寧宗朝待詔。賜金帶。善畫人物。高低醞釀。墨色如傅粉之色。筆法蒼老。墨汁淋漓。奇作也。雪景全學范寬。院人中畫山水。自李唐以下。無出其右者也。

毛松。沛人。原注一作吳郡崑山人。善畫花鳥。四時之景。

毛益。松之子。乾道間畫院待詔。善畫花鳥。小景。

王定國。汴人。隨吳郡王渡江。居臨安。工寫花鳥。師李安忠。亦學二崔筆法。傅色輕淺。清雅不凡。後郡王薦入仕。賜金紫。

陳居中。嘉泰年畫院待詔。專工人物。蕃馬。布景著色。可亞黃宗道。

白良玉。錢唐人。工畫道釋鬼神。寧理朝畫院待詔。子用和。輝能世其學。寶祐年畫院待詔。

王輝。錢唐人。理度朝畫院祇候。畫人物。道釋頗工。亦能作山水。草率。嘗用左手描寫。遂目爲左手王。

李瑛。安忠子。家傳畫花竹禽獸。紹興年畫院待詔。

李永年。嵩之姪。世其家學。咸淳畫院祇候。

何青年。錢唐人。善畫道釋人物。

陸青。師李唐。作山水。得筆法。用墨清秀。簡易不凡。喜用濃墨。木葉不分。惟風雨圖最佳。紹熙畫院待詔。

張訓禮。舊名敦禮。避光宗諱。改今名。學李唐畫山水人物。恬潔滋潤。時輩不可及。劉松年師之。一說著色青綠。如趙千里筆法。

趙大亨。乃二趙卓隸。每供其昆仲。研朱調粉。遂亦能畫。時人以其肥偉。目爲趙大漢。自恥其俗。因就名大亨。多畫青綠山水神仙故實。

於青年。毗陵人。嘉定間。專畫荷花草蟲。世號於荷。

馮大有。文簡公族孫。自號怡齋。寓居吳門。專畫蓮荷。精巧入格。

彭杲。錢唐人。師林椿。畫花果寫生。

高嗣昌。珣之從子。師李唐。作山水寒林古木。嘉定間。畫院待詔。

韓祐。石城人。尤善寫生。小景。花鳥。草蟲。師林椿。染色筆法。可並石橋王。紹興。畫院祇候。較之時流。畫頗覺版實。

戚仲。寶慶年殿司軍士。善絳色山水。師楊士賢。兼畫虎。師李迪。畫。左手書戚仲字。多喜作江湖圖扇面。

許迪。毗陵人。專工草蟲。師居寧。作黃花紫菜。青草紅葉。精妙入神。

楊安道。九江人。人物山水。師范寬。筆法有江湖氣韻。

林谷成。作人物山水樹石。平遠秀麗清潤。江右多作范寬收藏。

牟仲甫。隨州人。畫猿獐猴鹿與易元吉相似。湖廣多有之。

李珣。從訓子。能世其學。淳熙。畫院待詔。

樓觀。錢唐人。工畫花鳥人物山水。學馬遠筆法。傅色俱不細潤。咸淳年畫院祇候。

馬麟。遠之子。能世家學。然不逮父。遠愛其子。多於己。畫上題作馬麟。蓋欲子得譽故也。為畫院祇候。

方椿年。錢唐人。工畫人物道釋。著色山水神仙故實。紹定年待詔。景定年陞祇候。

蘇顯祖。錢唐人。工畫人物山水。與馬遠同時。筆法亦相類。但筆法稍弱。嘉定年畫院待詔。俗呼其畫為沒

興馬遠

朱懷瑾。錢唐人。寶祐年畫院待詔。景定間為福王府使臣。咸淳年賜金帶。作人物山水樹木窠石。多畫雪

景。筆法用墨。全師夏珪。謹守規矩。殊欠瀟灑。

孫必達。錢唐人。善畫道釋鬼神。師蘇漢臣。淳祐年畫院待詔。

俞洪。錢唐人。師梁楷。畫人物山水。布景著色逼真。但筆法差弱。紹定年畫院待詔。

毛允昇。益之子。能世家學。景定年畫院待詔。

李權。錢唐人。師梁楷。咸淳年畫院祇候。

陳清波。錢唐人。多作西湖全景。喬鍾馗。喬三教。寶祐年待詔。

葉肖岩。杭人。作人物小景。類馬遠。專工傳寫。寶祐間人。

馬永忠。錢唐人。寶祐畫院待詔。師李嵩。嵩多令代作。

豐興祖。錢唐人。工畫人物山水。界畫花禽。師李嵩。景定畫院待詔。

張仲工。畫花禽。筆法可並林椿。寶祐年待詔。亦善人物山水。

顧興裔。錢唐人。專師馬和之。筆法設色。俱不逮。淳祐年畫院待詔。

孫覺。善水墨。白描毛女。筆力細巧。寶慶年畫院待詔。

陳宗訓。杭人。師蘇漢臣。畫釋道人物仕女。描染未精。人呼爲鐵陳。紹定年畫院待詔。

范安仁。錢唐人。寶祐畫院待詔。善畫魚。俗呼范癩子。

夏森。珪之子。善畫山水。筆法用墨。不逮其父。遠甚。

胡彥龍。儀真人。善畫人物。天神寒林。水石窠木。描法用大落墨。自成一家格法。紹定間。苗安撫薦入朝。爲

畫院待詔。

趙芾。鎮江人。作人物山水窠石。江勢波浪。金焦二山。有氣韻。有筆力。師古人。無院體。惜乎僅作一郡之景。

畫意不遠耳。

魯宗貴。錢唐人。善畫花竹。鳥獸窠石。描染極佳。尤長寫生。雞雛鴨黃。最有生意。紹定年畫院待詔。出入楊

駙馬府。

錢光甫。原注甫一作普。杭人。專科畫魚。帶景精妙。如活可愛。景定間畫院待詔。

陳可久。寶祐間待詔。工畫魚。四時花木。師徐熙。上花下魚。筆力意淺。用色鮮明。

李章。杭人。從訓之後。善畫人物。著色山水。

蘇堅。焯之子。善畫道釋人物。慶元間待詔。

范彬。錢唐人。善畫人物山水。師李權。劉朴其弟子也。

陳珏。錢唐人。號桂岩。善人物。著色山水。寶祐年待詔。子琳。世其學。

崔友諒。金陵人。善畫道釋人物。絳色山水。淳祐年。馬光祖薦補畫院待詔。多作大幅雪景。及小簇子。

劉朴。師范彬。又師梁楷。畫人物。子耀。世其學。

徐道廣。杭人。號古岩。畫花鳥。師樓觀。景定年待詔。

曹正國。字良有。善畫佛像。天神。描法入格。景定待詔。

李德茂。迪之子。善畫花禽。鷹鵠。野景。不逮其父。淳祐待詔。

謝昇。杭人。善畫花竹。仕女。景定年待詔。

顧師顏。杭人。師李嵩。畫道釋人物。景定年待詔。

史顯祖。杭人。善畫人物。仕女。青綠山水。端平年待詔。

周鼎臣。杭人。師王輝。畫道釋人物。

朱玉。杭人。號柳林。朱善畫。天神。雷部兵將。寶祐待詔。

張翠峯。淮陽人。師胡彥龍。專畫龍神。雷部天將。

衛松。二趙昆仲。皂隸。嘗供役使。遂多獲其遺稿。且熟識其用意。傅色制度。與趙大亨每倣二趙圖寫。皆能

亂真。

單邦顯。吳郡人。學千里晞遠。畫林木山水。則全不然。惟花卉。蠶蟻。粗可彷彿。

老戴。忘其名。吳郡崑山人。亦學二趙。林木山水。可追蹤趙大亨。衛松。花蟲。謬甚。與單邦顯正相反。

趙子雲。江西人。能作一筆畫。凡寫人面及手。描畫頗工。至衣摺。則如草符篆。一筆而就。蓋不欲蹈襲。自成一家耳。

陳善。紹興間人。學易元吉。畫猿獐禽鳥花果。頗能逼真。傅色輕淡。過於林吳。

劉思義。紹興間待詔。專畫青綠山水。拙於布置。善於傅色。亦不足觀。

朱光普。字東美。汴人。南渡。補入畫院。學左建。畫村田樂。及農家迎婦等。亦善山水。

朱森。銳之弟。工山水人物。布置行筆。俱不逮兄。

楊公傑。不知何許人。畫小景禽鳥。得荒閒之趣。

張紀。錢唐人。師李迪。工畫花竹禽獸。不及其師。

朱紹宗。工畫人物。貓犬花禽。描染精邃。遠過流輩。隸籍畫院。

王宗元。不知何許人。家居石橋。人遂目爲石橋王。專學惠崇。作池塘小景。頗有野趣。

周詢。錢唐人。工畫界畫樓臺。占籍后邱。少與人畫。故所傳不多。

王友端。不知何許人。工畫獵犬。得其搖尾乞憐之態。世不多見。亦善花鳥。

秦友諒。毗陵人。少爲縣吏。善畫草蟲。其花卉。未可言工。特於蟬螻之類。傅色輕妙。人頗稱之。

李東。不知何許人。理宗時。常於御街鬻明苗。本作粥。其所畫村田樂。常酣圖之類。僅可娛俗眼耳。

畢生。文簡公諸孫。寓居吳郡。工畫牡丹。甚有生意。其壻姚亨。能繼其業。

僧智叶。白描佛像人物。



僧眞惠善畫花窠。

僧希白白描荷花。

聞秀才善畫梅蘭竹石。

員眞字光祖一字勝之金陵人畫墨竹坡石。

吳迪字泰之杭州人畫梅蘭竹石蕭散可喜扁所居室曰惠齋號心玉道人。

陸仲明畫山水窠石。

李思賢畫人物山水。

張思義善畫人物花竹。

閻次安仲子畫山水窠石。

黃益畫山水學夏珪。

王公道畫山水人物小景。

侯守中畫花竹翎毛。

李春畫神佛。

李遵畫人物嘗見有女孝經圖傳世。

孫用和畫道釋人物。

張團練山水人物頗清潤。

李煥。畫神佛。

李確。白描學梁楷。

徐凱之。畫人物窠石。

王用之。輝子。畫道釋人物。

房欽。畫花竹。

徐世榮。畫界畫。兼工嬰兒。

衛昇。畫花鳥甚佳。

夏東叟。畫道釋人物。

宋良臣。畫花鳥。

黃承務。道釋人物。兼寫照。

魏道士。畫道釋人物。

章程。畫人物山水。

呂源。畫花禽。

綱兵朱。畫山水窠石。

王木。畫蕃馬。

夏子文。畫山水。

赤目張畫山水師夏珪。

葉森畫山水。

儲大有畫花竹。

楊八門司畫蘭石窠木。

何閣長畫魚。

蔣太尉畫山水窠石梅蘭。

劉門司墨戲。

李苑使墨戲。

張鉞字功父號約齋清標雅致爲時聞人詩酒之餘能畫竹石古木字畫亦工。

毛存杭人父伯益坐韓侂胄黨流嶺表存乃跋涉數千里函骨歸里杭人稱篤孝善墨竹水石如楊中齋。

裴德游諸人皆宗之號勿齋人但謂之毛門司。

王介號默菴慶元間內官太尉善作人物山水似馬遠夏珪亦能梅蘭。

劉夫人希字號失傳建炎年掌內翰文字善畫人物師古人筆法及寫宸翰字高宗甚愛之畫上用奉華

堂印。

胡夫人平江胡元功尙書女黃尙書由之妻自號惠齋居士精於琴書畫梅竹小景俱不凡時比李易安夫人。

湯夫人叔雅之女。趙希泉妻。寫梅竹。每以父閒菴圖書識其上。

翠翹。洪內翰侍人。失其姓。自題云。翠翹戲筆。字畫婉媚。程大昌題詩云。戲作風枝斜。再惱玉堂宿。

蘇氏。建寧人。淳祐間流落樂籍。以蘇翠名。嘗寫墨竹扶疏。旁八分書題。如倚雲拂雲之類。頗不俗。亦作梅

蘭。

趙士表。宋宗室。善山水。尤喜作墨竹。思致如鄆王。秀潤過之。

羅仲通。汴人。好畫墨竹。頗自珍惜。故傳世絕少。所作殊精緻。但類院體。行筆巧妙。乏蕭散氣象。

李明友。字題孺。成都人。

黃廣。字彥暉。靖州人。

霍适。字南仲。渭州人。俱善畫竹。

吳璜。延陵人。畫竹師文湖州。

師永錫。蜀人。嘗畫老竹枯木。

王世英。字才仲。號頤齋。不知何許人。效東坡作墨竹。

來子章。不知何許人。作墨竹。但葉失之太短。

鑑湖。隋民云。賀方回裔孫。名字未詳。作平遠細竹。瀟灑可喜。

尹大夫。遺其名。高宗朝畫院待詔。善墨竹。

張茂。杭人。光宗朝隸畫院。作山水花鳥。俱精緻。小景更佳。

趙子厚。宋宗室。作小山蘂竹。有思致。  
劉浩。常州無錫人。作窠石人物。紹興中人。男顯。世其業。  
劉文惠。善畫花鳥。  
何浩。畫花鳥。類李迪。  
侯必大。不知何許人。工畫花竹。  
陶忠。工水墨山水。紹興中人。  
游昭。京口人。習山水。紹興間人。  
李祐之。東京人。紹興間。居臨安。寫佛像鬼人。明苗本作神。尤工牛馬。  
左建。西京人。用逸筆畫村田樂。  
田宗源。字子濟。東京人。習范寬山水。尤工雜畫。後居金陵。  
周珏。專畫水。紹興中人。  
時光。大名人。習賀真山水。筆蹟細碎。喜作短松怪石。密林芳樹。後居鎮江。男建亨。小字烏郎。亦能畫。  
執煥。紹興中殿前使臣。工畫人物。故實。  
張鑑。字季萬。北人。後居滁州水口。善草書。尤工山水。得破墨法。  
呂元亨。金陵人。工花鳥。  
林俊民。紹興畫院待詔。習范寬山水。

祝次仲字孝友太末人工山水尤善草書

徐本工雜畫紹興間人

黃庭浩工人物

武克溫上京人紹興間工蕃馬

陸琮工山水蕃馬學田宗源

毛文昌工田家風俗

陳廣宣城人習徐白魚水

雖世雄工魚水

施義金陵人習李唐山水

周白平之曾祖工山水

董琛金陵人習施義山水

劉興祖工花鳥師江伯清後習韓祐

熊應周金陵人習小米山水兼工花鳥

陸懷道通州人習田宗源山水作濺瀑出而無源流而不散

毛政廬江人工神佛及山水

趙君壽臨安人工傳寫及仕女



趙賓王鄂渚人工傳寫。

萬濟工墨竹。

宋永年臨江人。後居金陵。善寫梅。

趙山甫京口人。淳熙中習老米山水。

王洪龍祥俱蜀人。習范寬山水。

陳禧金陵人。乾道中工雜畫。

何世昌淳熙畫院人工花鳥。

陳椿杭人。習郭熙山水。乾道間祇應甲庫。

徐世昌石城人。本之從子。工花鳥。

魯莊杭人工人物。乾道間祇應脩內司。

徐京宗馬遠山水。

王安道宗李迪花鳥。

林彥祥紹興間人。嘗臨盧鴻草堂圖。小米跋其後。

衛光遠畫花鳥。師李迪。

曹瑩畫花鳥。師李迪。

周左山水人物。師周儀。

陳左仕女宗陳宗訓。

梁松隸畫院師賈師古描寫飄逸青過於藍。

李公茂安忠之子世其家學然不逮父。

宋碧雲景定間畫院待詔善人物花竹翎毛。

吳俊臣江南人淳祐間畫院待詔善人物山水多作雪景師朱銳。

王曾字孝先封沂國文正公昭陵名臣書畫皆合格。

吳瓌益王子琚之弟工畫竹。

翟汝文字公巽潤之丹陽人紹興初參知政事嘗自畫佛道像六十餘軸及著色楚天春曉圖藏於家。

湯叔周乃叔雅之弟亦工墨梅。

紫微劉尊師僞齊豫之孫工山水。

趙師舉字從善千里之姪善花。

曹申甫工木石風竹與梵隆爲畫友。

王華景祐間畫院待詔工花鳥。

包案宣城人家世畫虎能紹其業。

盛師顏金陵人工雜迹及道釋像仕女疑面每用北螺青或烟墨水淡開謂之青蛾粉白有一種富貴氣象。

牟益字德新。理度朝人。畫入能品。

僧德止。號清谷。工畫。嘗畫廬山尋真觀二壁。朱文公題其上。

張翼。字性之。號竹林。金陵人。初學畫於明彥龍。成於盛師顏。人物道像雜迹外。尤工逸筆。居杭時。嘗爲巨

璫羅大節。作導引四圖。各系以自製小讚。羅上直時。張於直舍中。理宗顧見之。曰。此畫極工。緞可於關

下開版。竟不問誰筆。其運窮不偶如此。

顏直之。字方叔。號樂閒。吳郡人。善小篆。工畫人物。

金

顯宗。章宗父。畫獐鹿人馬。學李伯時。墨竹自成一家。雖未臻神妙。亦不涉流俗。章宗每題其籤。

海陵煬王。完顏亮。嘗作墨戲。多喜畫方竹。

完顏璘。字仲實。號樗軒。封密國公。家藏法書名畫。幾與中祕等。喜作墨竹。自成規格。亦甚可觀。

王庭筠。字子端。號黃華老人。遼東人。大定中進士官。至翰林脩撰。善山水古木竹石。上逼古人。論者謂胸

次不在米元章下。尤善草書。曼慶子。

王曼慶。字禧伯。號澹游。善墨竹樹石。絕佳。亦能山水。然不迫墨竹。官行省左右司郎中。

任詢。字君謨。號南麓。易州人。草書入能品。山水亦佳。在王子端下。

李澥。字公渡。相州人。能行書。工畫山水。

龐鑄。字才卿。號默翁。大興人。明昌進士官。至京兆轉運使。善山水禽鳥。

李通字平甫。號寄菴。樂城人。明昌進士。官至東平府治中。善山水。嘗爲元裕之畫繫舟山圖。得前輩不傳之妙。龍虎亦佳。

李仲略字簡之。大定進士。官至山東按察使。畫山水。嘗臨米元章楚山圖。劉謙光甫父。號明別本。無號字。東軒工畫山水。

王競字無競。彰德人。官至翰林承旨。善大字。作墨竹亦古怪。

虞仲文字質夫。武州定遠人。善畫人馬。墨竹學文湖州。官至平章。封秦國公。

趙秉文字周臣。號閒閒。滏陽人。官至翰林學士。書效鍾王。畫梅花竹石。筆力雄健。命意高古。

蔡珪字正甫。丞相松之子。畫墨竹學文湖州。官至濰州守。

張汝霖字仲澤。遼陽人。畫墨竹師黃華。官至平章。

耶律履字履道。契丹人。東丹王七世孫。官至尙書右丞。善畫鹿。作人馬。墨竹尤工。

耶律浩然。工山水。

韓將軍。未詳其名。善墨竹。

馬天駟字雲章。介休人。能畫。作小竹石。瀟灑可喜。弟雲卿。雲漢。皆善畫。

陳道輔。京兆人。好寫墨竹。自號夜江散人。

謝宜休妻。遺其姓氏。小字阿環。山水學李成。精妙合格。竹學王華。亦可觀。

武元直字善夫。明昌名士。能畫。有巢雲曙雪等作。

李元素。

趙霖。

周濟川。並善畫。

喬夫人。工墨竹。

李早。工畫。人物甚佳。樹石不稱。明昌間人。張翰林翥嘗題其三馬圖云。金原六葉全盛年。明昌政似宣和。

前寶書玉軸。充內府。時以李早方龍眠。

武伯英。崞縣人。進士官至觀州同知。善畫。

劉器之。祁陽人。以墨竹得名。兼精小景。

張公佐。并州人。工山水。明昌泰和間。推爲獨步。

大簡之。渤海人。工松石小景。

錢過庭。畫山水。以米老楚山清曉圖爲法。

段志賢。工畫龍。

徐榮之。工花鳥。

李仲華。善畫。湍流高樹。

李漢卿。東平人。工草蟲。

黃謁。精蕃騎。嘗見雪獵圖。題大金國御前應奉黃謁。

胡先生。又號胡叟。不知何許人。工山水。

杜文。字莘老。雲中人。工山水。

張珪。正隆中。工人物。

重陽真人王壽。字知明。咸陽人。大定中得道。登真。其初度馬丹陽夫婦。日嘗畫骷髏天堂二圖。并自得真。

及作松鶴圖。與史宗密真人。

僧元悟。禪師。能詩書墨竹。學樞軒。

僧歸義。工山水。

龍門公。善墨竹。

隱秀君。善山水。

卷五

元朝

趙孟頫。字子昂。號松雪道人。宋宗室。居吳興。官至翰林學士承旨。贈江浙行省平章政事。封魏國公。諡文敏。榮際五朝。名滿四海。書法二王。畫法晉唐。俱入神品。

趙雍。字仲穆。文敏子。官至集賢待制。同知湖州路總管府事。畫山水。師董源。尤善人馬。書篆俱精妙。子鳳。字允文。畫蘭竹。與迺父亂真。集賢每題作已畫。以酬索者。故其名不顯。麟。字彥徵。以國子生登第。今爲



江浙行省檢校善畫人馬。

李衍字仲賓號息齋道人。薊邱人。官至江浙行省平章政事致仕。封薊國公。諡文簡。善畫竹石枯槎。始學王澹游。後學文湖州。著色者師李頗。馳譽當世。

李士行字遵道。文簡子。官至黃岩知州。畫竹石得家學而妙過之。尤善山水。

商琦字德符。曹南人。左山參政第七子。官至集賢學士。山水師李營邱。得用墨法。墨竹自成一家。亦有妙處。

商璿字台元。左山之姪。司業台符之弟。自號遜齋。安恬不仕。喜畫山水。得破墨法。窠石最佳。

劉融字伯熙。薊邱人。官至祕書卿。善畫山水。師郭熙。

柯九思字敬仲。號丹邱生。台州人。官至奎章閣鑒書博士。博學能文。喜寫墨竹。師文湖州。亦善墨花。

王振鵬字朋梅。永嘉人。官至漕運千戶。界畫極工。綴仁宗眷愛之。賜號孤雲處士。

周密字公謹。號草窗。歷山人。居錢唐。宋寶祐間爲義烏令。家藏名畫法書頗多。善畫梅竹蘭石。賦詩其上。鄭思肖字所南。福州人。工畫墨蘭。嘗自畫一卷。長丈餘。高可五寸許。天真爛漫。超出物表。題云。純是君子。

絕無小人。

金應桂字一之。號蓀壁。錢唐人。在宋爲縣令。歸附後。隱風篁嶺。書法歐陽率更。畫學李龍眠。嘗作岩居上真出塵觀音刻石。

錢選字舜舉。號玉潭。霅川人。宋景定間鄉貢進士。善人物山水。花木翎毛。師趙昌。青綠山水。師趙千里。沈

善作折枝其得意者自賦詩題之。

龔開字聖與號翠岩淮陰人宋景定間兩淮制置司監當官作隸字極古畫山水師二米畫人馬師曹霸描法甚麗尤喜作墨鬼鍾馗等畫怪怪奇奇自出一家。

沈孟堅畫花鳥師錢舜舉往往逼真。

上正真先名纘字承之號竹齋又號筠溪杭人以宋內侍奉謝后北覲受命佩虎符一旦辭入道工山水墨竹學毛勿齋。

趙孟頫字子俊文敏弟官至知州畫人物花鳥頗佳。

陳琳字仲美珏之次子善山水人物花鳥俱師古人無不臻妙見畫臨模咄咄逼真蓋得趙魏公相與講明多所資益故其畫不俗論者謂宋南度二百年工人無此手也。

劉敏字有功宣德龍門縣人賜號龍門居士自號年豐老人善畫墨竹學顧正之有風烟夕翠圖傳於世子世亨字嘉甫亦善墨竹。

史杠字柔明號橘齋道人官至行省左丞讀書餘暇弄筆作人物山水花竹翎毛咸精到。

郭敏字伯達杞縣人幼讀書長好丹青工畫人物山水喜武元直畫師其意不師其法至於花卉墨竹亦各臻妙官至州倅。

李有字仲方先名立義燕人官至兩浙運司經歷善古木竹石筆意高遠作者推服。

喬達字達之燕人官至翰林直學士善丹青山水學李成墨竹學王庭筠後更學文同。

王英孫字才翁號脩竹紹興人宋將作監簿入朝隱居不仕作墨竹蘭蕙頗雅潔不凡  
李侗字士宏號員嶠真逸官至集賢侍讀學士喜作墨竹宗文湖州

田衍字師孟彰德人性穎異博識多藏古法書名畫畫墨竹學王澹游頗得雅趣

張衡字士衡樂陵人爲中書左司員外郎辭門苗本作開屢辟不起作文字務奇古書學張長史苗本脫  
史字山水學荆關墨竹不師古人自成一派

顧正之不知何許人善墨竹學樂善老人有酷似處人莫能辨

范庭玉保定人善墨竹師樂善老人筆法

劉貫道字仲賢中山人工畫道釋人物鳥獸花竹一一師古集諸家之長尤高出時輩亦善山水宗郭熙  
佳處逼真至元十六年寫裕宗御容稱旨補御衣局使

柴楨字君正東平人自號適齋善畫山水才思天賦不習而工

信世昌字雲甫東平人自號中隱善畫山水學於沈士元有出藍之譽墨竹別成一家蓋黃華之後又一  
變者也

李章字君章東平人善書晚年畫墨竹有高致

胡瓚字元禮京兆人官至衡州路同知善丹青墨竹

韓公麟字國瑞號雪谷真定人爲太醫副使善養生之學留情翰墨喜寫竹筆意簡當殊有生意  
牛麟字伯祥太原人初業詞賦作大字畫墨竹意度蕭散

張德琪字廷玉燕中豪家讀書樂道行書學劉房山草書學張長史畫墨竹梅花竹學王澹游有佳趣。

劉德淵字仲淵燕人官至藍山縣尹墨竹學劉自然。

韓紹曄字子華燕人官至御衣局使畫山水學武元直墨竹學樂善老人。

張敏夫燕人喜畫墨竹學顧正之。

高吉甫燕人喜畫竹石宗劉自然亦無大過人者。

趙淇潭州人宋趙葵之仲子號平遠又號太初道人故合而曰平初又云靜華翁官至湖南宣慰使作墨竹長竿勁節風致甚佳。

周堯敏字禹卿號學山海鹽當湖人畫竹宗文湖州頗有得處。

王鼎字德新海鹽人好寫竹學丁子卿深悟筆意子泰之號竹趣能紹父業。

謝顯字耀卿號隱麓大名人畫墨竹宗員大夫原注員一作尹。

劉廣之燕人善寫墨竹。

宋敏字好古善墨竹。

沈雪坡嘉興魏塘人好寫梅竹。

姚雪心台州黃岩人畫墨竹宗文湖州。

趙雲岩溫州人寓華亭青龍鎮喜作花鳥設色有法亦善墨戲墨竹。

喬戚里名字出處未詳畫梅竹石建安白鶴山嶽祠東廡中壁有其畫。

王仲元不知何許人。專門花鳥。尤善作小景。得用墨之法。溫潤可喜。

自然老人。姓劉氏。遺其名。真定祁州人。兵後居燕。工畫墨竹禽鳥。

牛老。大名人。自少居市廛間。作絲絹牙郎。號窩絲牛。能畫墨竹。得於巧性。不師古人。亦粗可觀。

朱淳甫。濟陰人。居曹之樂平坊。世業丹青。山水人物樹石俱精。亦寫梅竹。有佳致。

焦善甫。燕人。工雜畫花竹人物。尤長寫貌。

陳仲仁。江右人。官至陽城主簿。善山水人物花鳥。爲湖州安定書院山長。日與趙文敏論畫法。文敏多所

不及。後見其寫生花鳥。含豪命思。追配古人。嘆曰。雖黃筌復生。亦復爾耳。其見重如此。

顏輝。字秋月。江山人。善畫道釋人物。

孫君澤。杭人。工山水人物。學馬遠夏珪。

吳梅山。工山水人物。

吳梅溪。工花鳥雜畫。

馮君道。錢唐人。畫花竹翎毛。性酷嗜鷓鴣。每袖養之。觀其飲啄。以資畫筆。

楊月澗。畫花鳥龍虎。

楊說岩。畫道釋。尤工寫貌。

馬虛中。善畫花鳥山水。

許擇山。工畫神佛。

沈月田工畫林木樹石。

朱梅間善畫花竹。

劉耀字耀卿朴之子畫山水學馬遠夏珪。

吳古松杭人山水學郭熙。

王淵字若水號澹軒杭人幼習丹青趙文敏多指教之故所畫皆師古人無一筆院體山水師郭熙花鳥

師黃筌人物師唐人一一精妙尤精墨花鳥竹石當代絕藝也。

朱德潤字澤民吳郡人官至征東儒學提舉畫山水學郭熙其合作者甚佳。

唐棣字子華吳興人官至休寧縣尹畫山水師郭熙亦可觀。

黃公望字子久號一峯又號大癡道人平江常熟人幼習神童科通三教旁曉諸藝善畫山水師董源晚年變其法自成一家山頂多岩石自有一種風度。

曹知白字貞素號雲西華亭人畫山水師馮覲筆墨差弱而清氣可愛有僕夏汲清亦能畫。

吳鎮字仲圭號梅花道人嘉興魏塘鎮人畫山水師巨然其臨模與合作者絕佳而往往傳於世者皆不

專志故極率略亦能墨竹墨花。

倪瓚字元鎮號雲林生常州無錫人畫林木平遠竹石殊無市朝塵埃氣晚年率略酬應似出二手。

盛懋字子昭嘉興魏塘鎮人父洪甫善畫懋世其家學而過之善畫山水人物花鳥始學陳仲美略變其法精緻有餘特過於巧。



孟玉潤。吳庭暉。皆吳興人。畫青綠山水花鳥。雖極精密。然未免工氣。同時有姚彥卿。亦能畫。王士熙。字繼學。東平人。官至御史中丞。善畫山水。

賈策。字治安。中州人。嘗爲杭仁和尹。畫花竹禽鳥。得其飛鳴翔集之狀。

顧安。字定之。不知何許人。嘗任泉州路判官。善畫墨竹。

陶復初。字明本。號介軒。老人。天台人。官至台州儒學教授。贈樂清尹師李薊邱父子。畫墨竹及著色竹甚工。亦能山水。

李箕嶠。河東人。官至翰林學士。善畫墨竹。

謝庭芝。字和仲。號雪村。平江崑山人。善畫墨竹。

李升。字子雲。號紫篔生。濠梁人。畫墨竹。亦能窠石平遠。

盛昭。字克明。揚州人。竹石師文湖州。

郭昇。字天錫。京口人。畫竹石窠木。

蘇大年。字昌齡。號西坡。真定人。居揚州。竹石師蘇東坡。窠木師廉仲宣。

張遜。字仲敏。號雲溪。吳郡人。善畫竹。作鉤勒法。妙絕當世。山水學巨然。則不逮竹。

顧達。一名達。字周道。中吳人。畫山水人物。并能寫貌。

口惟志。字彥功。號恕齋。大梁人。官至集賢待制。江浙儒學提舉。善墨戲。

邊魯。字至愚。號魯生。善畫墨戲花鳥。

陳君佐。宿州人。居揚州。山水師馬遠夏珪。墨戲師徽廟。

李容瑾。字公琰。畫界畫山水。師王孤雲。

林士能。字若拙。畫山水。無渾厚秀潤之氣。

朱裕。字敏道。延陵人。畫山水。師李成。

沈麟。字秋澗。杭人。畫山水。學郭熙。兼能寫貌。

鄭禧。字熙之。吳郡人。善墨。苗本作畫。山水學董源筆法。用墨清潤可喜。畫墨竹禽鳥。全法趙文敏。惜乎天折。

王蒙。字叔明。吳興人。趙文敏甥。畫山水。師巨然。甚得用墨法。秀潤可喜。亦善人物。

趙元。字善長。山東人。畫山水。師董源。

張義上。字師夔。善畫山水。

陳植。字叔方。吳郡人。畫樹石。甚有意趣。

李士傳。字仲芳。薊邱人。畫山水。人物學李伯時。尤善摹徽廟墨戲。

戴淳。字厚夫。錢塘人。善畫山水。

杜本。字原父。畫墨牛葡萄。甚可觀。亦善山水。

吳屋。字從禮。杭人。臨摹院畫。咄咄逼真。

張渥。字叔厚。號貞期生。杭人。善白描人物。筆法不老。無古意。

王冕字元章。會稽人。能詩。善畫墨梅。萬蕊千花。自成一家。凡畫成。必題詩其上。吳瓘字瑩之。嘉興人。多藏法書名畫。能作窠石墨梅。學揚補之。頗有清趣。

張文樞字石隱。湖州德清人。幼嘗爲僧。能畫山水。學巨然。亦善墨竹。

李沖字用之。善畫山水。學李成。荆浩。

張遠字梅岩。華亭人。善畫山水。人物。學馬遠。夏珪。至於潛補古畫。無出其右。臨亦能亂真。

陳鑑如居杭州。精於寫神。國朝第一手也。其子芝田。能世其業。

佟士明居上都。以寫貌得名。

冷起岳居京師。工傳神。至正間。嘗寫御容。稱旨。

王繹字思善。杭人。善寫貌。尤長於小像。不徒得其形似。兼得其神氣。

林伯英。嘉興魏塘人。工畫花鳥。師樓觀。

周如齋。杭人。畫山水。學高房山。

沈月溪。華亭青村人。以稜作爲業。畫山水。人物。學馬遠。往往亂真。人莫能辨。

邊武字伯京。京兆人。善墨戲花鳥。

王迪簡字庭吉。號叢隱。越人。善畫水仙。

陶鉉號菊村。金陵人。畫山水。師李成。

謝佑之居都下。善畫折枝。傅色差厚。蓋欲做趙昌。而未能升堂者。

劉夢良蜀人畫梅花宗揚補之。

朱邱蜀人善畫竹木。

簡生蜀人善畫山水。

陳立嘗畫龍眠山圖虞先生集題之。

華岳善山水楊先生載詩云華岳能詩世有名學畫丹青亦疏放。

潘桂金陵人宋末張翼孫壻也善寫貌。

何大夫工畫人馬虞先生詩云國朝畫手何大夫親臨伯時閱馬圖。

霍元鎮規模董北苑米南宮父子寫山水雲物殊有標致。

王起宗善畫山水樹石。

戈叔義善畫墨竹。

臧良字祥卿錢唐人畫花竹翎毛師王若水。

夏迪字簡伯溫州人畫山水竹石。

趙天澤字鑑淵蜀人畫梅竹。

張中字子正松江人畫山水師黃一峯亦能墨戲。

衛九鼎字明鉉天台人畫界畫師王孤雲。

徐愷字士元湖州南潯鎮人畫山水師李成。

曾瑞卿號褐夫居錢唐工畫山水學范寬

張觀字可觀松江楓涇人世業稜作畫山水學馬遠夏珪特長於模倣

趙清澗淮人工畫人物仕女

楊基字孟載蜀人居平江畫山水竹石

高克恭字彥敬號房山其先西域人後居燕京官至刑部尙書善山水始師二米後學董源李成墨竹學

黃華大有思致怪石噴浪灘頭水口烘瑣潑染作者鮮及

伯顏不花高昌世子而鮮于伯幾之甥號蒼岩官至江東廉訪副使工畫龍

赤蓋君實女真人居燕城畫竹學劉自然頗有趣

蕭鵬搏字圖南本契丹人父榮甫王子端之甥圖南幼有巧思博學多能詩書畫三事皆追蹤黃華尤長

於山水亦喜墨寫梅竹

丁野夫回紇人畫山水人物學馬遠夏珪筆法頗佳

宋嘉禾上黨人俗優也畫人物學石恪減筆好作利市仙官和尚骨格態度俗工莫及亦能墨竹小景絕佳

宋汝志錢唐人宋景定年畫院待詔歸附後爲開元宮道士號碧雲善畫人物山水花鳥師樓觀

天師張興材字國梁號薇山別號廣微子封留國公居信州龍虎山能大字畫竹與龍

天師張嗣成號太玄能畫龍亦嘗見其所畫廬山圖

天師張嗣德號太一畫墨竹禽鳥。

道士方壺居上清宮畫山水極瀟灑無塵俗氣。

道士吳霞所居龍虎山善畫龍。

六一道士張彥輔多居京師善畫山水。

道士趙元靖不知何許人浪游閩浙間以墨竹有名所至淋漓牆壁雖頗近繁重亦有可觀。

道士丁清溪錢唐人工畫道釋人物師李嵩王輝馬麟尤善寫貌。

道士王景昇杭人居開元宮善畫道釋人物學王輝李嵩。

道士徐太虛不知何許人善畫山水。

道士盧益修天台人善畫水仙學趙子固。

道士蕭月潭淮人善白描道釋人物。

宗師溥光字元暉號雪菴俗姓李氏大同人特封昭文館大學士賜號元晤大師善真行草書亦善畫山

水學關全墨竹學文湖州俱成趣。

頭陀溥圓字大方號如菴俗姓李氏河南人於雪菴爲法弟書學雪菴山水墨竹俱學黃華。

僧海雲墨竹學樗軒。

僧妙圓墨竹頗有法度。

僧智浩號梅軒墨竹雖少蘊藉洒脫簡略得自然趣。



僧道隱字仲孺號月澗俗姓李氏海鹽當湖人蘭石學趙子固墨竹宗王翠岩

僧允才號雪岑受業嘉興石佛寺墨梅竹似丁子卿

僧時溥字君澤號雨岩華亭人居奉賢鄉接待寺通經律作詩亦畫墨竹三梢五葉而已

僧智海居燕中喜畫墨竹學海雲禪師

僧明雪窗畫蘭柏子庭畫枯木菖蒲止可施之僧坊不足爲文房清玩

管夫人道昇字仲姬趙文敏室贈魏國夫人能書善畫墨竹梅蘭

劉氏不知何許人孟運判室號尚溫居士能臨古人字逼真喜吟小詩墨竹效金顯宗亦粗可觀

蔣氏汴人完顏用之室嫠居以清淨自守好作墨竹

張氏喬德玉室善寫竹

### 外國

日本國古倭奴國也有畫不知姓名傳寫其國風物山水設色甚重多用金碧然殊方異域而能留意繪

事亦可尙也至今倭僧多能作墨畫觀音佛像

高昌國畫用金銀箔子及朱墨點點如雨銷洒紙上畫翎毛如中國花卉亦佳

夏國英宗元昊通蕃漢文字善繪畫

西蕃畫佛像多畫於布上作奇形詭狀上用油油之

高麗畫觀音像甚工其源出尉遲乙僧筆法流而至於纖麗

補遺

宋

宗少文。南陽人。文帝朝。徵不起。妙善書畫。

齊

宗測。字敬微。一字茂深。宋徵士。少文孫。明帝徵爲司徒主簿。不就。善畫。

毛惠秀。善畫。武帝欲北侵。使畫漢武北伐圖。

劉瑱。字士溫。官至義興太守。爲當世所稱。尤長於婦人。

毛惠遠。滎陽人。善畫馬。與劉瑱同時。並爲當世第一。

殷蒨。陳郡人。善寫人。與真不別。

梁

南郡大連。字仁靖。簡文帝子。善丹青。

蕭賁。字文奐。齊武帝曾孫。官湘東王法曹參軍。善畫。

後魏

王由。字茂道。官至東萊太守。善書畫。

唐

李從儼岐王茂貞子工書畫官至鳳翔節度使

田宏正工丹青尤善圖人形表官至魏博節度使

梁令瓚或云蜀人開元中工畫人物宋祕閣有五卷二十八宿真形圖一卷李伯時云甚似吳生

倪麟開元中集賢畫直工人物

陳子昂工畫人馬

楊岫之大歷中工鬼神

周助工佛像

修處士工花鳥

李颯工花鳥

桓言桓駿皆善屋木

周邁工人馬

令元素工古仙事迹

于邵以德宗誕日進自畫松竹圖

李方叔元和中工山水人物自號西河山人

宋之望善傳寫

祁岳項洙范山人並工山水

杜宗河南人。工佛經變像。

李察張昱並善畫鷄。

韋叔方進士也。工畫馬。

梁司馬。工畫馬。

元俊善畫牛。及山坡草野之景。

盧珍爲內供奉。工人物及佛經變像。

陳庶揚州人。師邊鸞。花鳥尤善。布色。

裴遼善鸞鷲并牛。

崔希眞鍾陵人。精繪事。

侯造。工折枝并牛。

杜秀才善畫牛。

李紹。工花鳥。

張桂西川人。工雜迹。

李奉珪樊守素俱善人物。

李約善畫梅。

五代苗本誤作伐。

胡嚴徵。晉天福間。工神佛。

王畊。吳越人。善畫。尤工牡丹。

黃惟亮。峯之子。畫亦如其父兄。人鮮知者。

成處士。江南人。善寫真。

宋

欽宗。以徽宗元子。漸染聖藝。亦精繪事。居東宮。日嘗畫。唐十八學士圖。以賜官僚。張叔夜。豫章天台皆有

刻本。

仁懷皇后朱氏。欽宗后也。學米元暉。著色山水。甚精妙。畫上有印曰。朱氏道人。

趙令峻。字景升。封嘉國公。師李伯時。善畫馬。

高彥寔。開封人。畫佛像。學吳道子。

錢昆。字裕之。吳越王俶之子。歸朝。仕至祕書監。自畫寒蘆沙鳥於紈扇。人競藏之。

錢仁熙。武肅諸孫。頗讀書。善丹青。尤工水牛。多寫於紈扇上。人爭傳之。歸朝。歷信泰光三州倅。

錢易。字希白。廢王第十二子。歸朝。仕翰林。僂值而卒。自畫十六羅漢。極古怪。

錢鏐。字輔軒。武肅第五子。善丹青。

徐競。字明叔。歷陽人。以廕補官。善山水人物。宣和中。使高麗。撰圖經四十卷。行於世。

黃伯思。字長睿。閩人。政和間。終祕書郎。嘗模顧愷之桓溫像。閣立本文會圖。惟不出己意。

鄭天民字先覺宣和中爲郎官山水師巨然

趙廉東都人工山水宣和末甚得幸

胡錫錢唐人豐熙間以道釋像得名

王延嗣國初工鬼神

申屠亨畫山水宗黃筌

江惟清工佛道人馬

李象坤工佛道人馬鬼神

譚宏成都人工花果

曹訪畫柳塘家鵝學徐熙

陳文頊泉州仙遊人頗知書亦工畫

高述丹陽人學東坡書及竹石皆逼真

秦湛字處度少游子善著色山水

李咸熙王崇國初同時工人物

道士楊世昌字子京武都山人與東坡游善山水

邢敦字君雅隱居雍丘眞宗詔爲許州助教辭工畫

王述善羅漢學盧楞伽



宋純。花果染色。極似趙昌。

靳青。號野處。絳之驛卒也。遇異人得道。畫貓能逼鼠。

曾達。臣。號歸愚居士。江西人。工草蟲。

任撫。幹。不知何人。工山水。

譚季蕭。畫水墨梅竹。絕清潤。坡石亦佳。

道士朱大洞。錢唐人。山水人物。宗蕭照。

王鼎。北人。善人物仕女。山水。宗徽廟。頗粗俗。

王珏。北人。善花竹翎毛。學馬賁。

張萬成。花鳥宗林椿。

周吉言。仕女宗李嵩。

徐改之。山水學李唐。

李次山。工山林人物。

白思恭。工畫神佛。

時叔遠。道像人物。亦可取。

劉古心。工梅竹鳥雀。

寇君玉。工蟹。

張師錫工花竹禽鳥。  
徐皋乃白之族工魚。  
任生建康人工仕女。  
吳隱之工仕女。  
胡良史工山水。  
宋京工山水。  
戚化元毗陵人家世畫水化元兼工魚龍。  
董常嘉興人工道釋像筆力細而勁拔。  
馬隱東都人畫花師刁光胤工而不化。  
龍升善小景花竹山水學夏珪馬遠。  
張敏叔工花木。  
盧象先工道釋人物。  
李鬱平陽人人物精贍。  
許中正蜀人工鬼神及龍。  
郭煥邠州人善榻寫。  
劉漢卿工山水。

張德新善花鳥。

謝大昌嘉興人工平畫。

白昌華亭人工平畫。

李友直工山水。

李益渭州人工畫。

彩郎中河南人工畫。

劉允文廣漢人工佛像。

陳揚吳真孫玠並工雜迹。

曹虛白張咸熙皮簡並工畫。

賀六待詔海州朐山人家世專畫觀音。至其身於藝尤工。忽觀音化爲丐者。求畫。遂得真相。其名益彰。

危道人不知其名。住麻姑山。蓋有道者。工畫魚。

周弼字伯敬。汝陽詩人。善墨竹。

□斌工江潮。

□敏行彭州人工佛像。

僧修範潤州人工湖石。

僧志堅蜀人工山水。

僧彥深工佛像尤精觀音

僧明川工山水

遼

義宗諱倍小字圖欲太祖長子幼聰敏好學善畫本國人物如時騎雪獵千鹿圖皆入宋祕府

耶律題子字勝隱官至西南面招討都監嘗從北院樞密使侵宋宋將有因傷而仆題子繪其狀以示宋

咸嗟神妙

耶律褒字德隣官至太子太師風神秀爽工於畫

陳升聖宗翰林待詔嘗奉詔寫南征得勝圖

元

李希閔字克孝薊丘人畫山水竹石

趙彥正仲穆姪工畫人馬

僧維翰字古清江右人畫龍學所翁

續編

皇明

宣廟御筆有山水有人物有花果翎毛有草蟲上有年月及賜臣名寶用不一有廣運之寶武英殿寶等

寶。雍熙世人等圖書。臣仰惟宣廟臨御。當重熙累洽。四海無虞。萬幾之暇。留神詞翰。於圖畫之作。隨意所至。尤極精妙。蓋聖能天縱。一自自然。如化工之於萬物。因物賦形。不待矯揉。而各遂生成也。臣謹識。憲廟孝廟御筆。皆神像。上識以年月及寶。宗室中善寫神像。及金瓶金盤牡丹蘭菊梅竹之類。舊家多有珍藏者。

郭文通。永嘉人。善山水。布置茂密。長陵最愛之。有言馬遠夏珪者。輒斥之曰。是殘山剩水。宋僻安之物也。原注。文通之遭際。竹軒徐以道先生嘗言之。水東日記亦載之。

商喜。字惟吉。善山水人物。超出衆類。際遇累朝。士林多重之。今孫祚。字天爵。能世其學。

韓秀實。涿州人。與商惟吉同被寵渥。人物亦佳。尤喜畫馬。

張靖。山東人。道釋人物。得吳道子之奧。尤善寫照。

孫玘。字庭。曾孫錦。字大紳。俱能山水人物。寫照有其祖之妙。

殷善。字從善。金陵人。花果翎毛。極清致。子偕。字汝同。專其業。

邊景昭。隴西人。及子楚祥。花果翎毛。工緻過殷氏。

謝庭循。永嘉人。山水爲同事所宗。東里楊少師稱其清謹有文。尤精繪事。是以獨見重於宣廟。非他臣所能及。

周文靖。莆田人。山水堪配庭循。

王絨。字孟端。號友石生。又號九龍山人。昆陵人。高介絕俗。書法詩文皆出羣。任中書舍人。有王舍人詩集。

行於世。畫竹石絕倫。名馳天下。不輕與人。故人不可苟得也。

莊瑾字公瑾。號采芝。龍江人。爲人雅淡高致。能詩善草書。尤長於畫。師法夏珪馬遠。蓋張可觀以後一人而已。

僧溫日觀。妙於葡萄。無不知其名者。

胡大年。僧曉菴。皆工葡萄。

李在。字以政。莆田人。遷雲南。行取來京。山水細潤者。宗郭熙。豪放者。宗夏珪馬遠。其人物。評者謂八面生動。故四方重之。

戴進。字文進。號靜菴。又號玉泉山人。錢唐人。山水得諸家之妙。神像人物。走獸花果。翎毛。極其精緻。喜作葡萄。以配以鈎勒。竹蟹爪草。奇甚。眞畫流第一人也。子泉。字宗淵。山水得家傳。但用墨太重耳。

夏芷。字庭芳。錢唐人。從游戴靜菴。克勤於學。筆力逼其師。不幸早卒。弟葵。字庭暉。山水人物。皆工緻。華朴中。浙中詩僧戴靜菴。作畫得名。

上官伯達。譙川人。神佛人物。傅色既精。神彩亦備。能使人起敬。

夏景。字仲昭。初姓朱。登第後始改正。爲夏。東吳人。自中書舍人累進。太常寺卿。直內閣。詩文書法皆妙。喜作竹石。求者無虛日。一一應之。得之者寶藏。

張益。字士謙。與仲昭同郡。同登第。官至學士。寫竹亦妙。

陳嗣初。東吳人。以文章擅名翰林。任檢討。寫竹尤奇。仲昭士謙。皆師事之。



謝宇字伯寬號容菴湖廣衡陽人幼聰穎宣德中欽選司禮監與同中貴讀書以中書舍人直內閣累進工部左侍郎掌通政司事山水法諸大家花木鳥獸無不能者皆到妙處仲子中書舍人汝明字晦卿號東麓亦善山水

任道遜字克誠瑞安人詞翰皆佳官至太僕寺卿直文華殿善寫梅夫人孫氏亦能夫人之父任太守寫梅得名人以孫梅花稱之

夏衡字以平松江人工書法篆隸高古自中書舍人進太常寺卿作畫有黃子久之妙

金文鼎鶴城人工書法詩文流麗畫得黃子久筆意子鈍字汝厲銳字汝潛並有父風致

金湜字本清號朽木居士四明人善書法任中書舍人寫竹石甚佳其鈎勒竹尤妙官至太僕

陳謙字士謙號訥菴逸人書畫皆學趙松雪自誇體貼評者亦許其有六七分妙云

丁文暹號竹坡善山水翎毛筆力清勁

陳叔謙武林人苗本無人字玩古器識名畫其價直纖毫不爽作畫學倪雲林亦妙嘗書一聯於庭以自况博古圖蒐周漢制無聲詩寫晉唐題

王尚賢梅溪人善戲墨人物年至九十下筆益妙

姚綬字公綬號雲東逸史浙人由進士仕至監察御史有晉人風致早年掛冠優遊泉石畫法吳仲圭三絕之亞擘成圖或售於人遂厚價返收之其自重如此

孫隆號都癡毘陵人開國忠憲侯孫生而穎敏有仙人風度寫翎毛草蟲自成一家號沒骨圖

張祐字天吉鳳陽人爵襲隆平侯爲人和易如儒者作梅花清氣逼人其從弟祿字天爵亦世其爵梅花有其兄之妙

王謙字牧之號冰壺道人以儒士隆平侯聘爲西席善書作爲梅花清奇可愛實天吉之師也子應奇作梅得家傳

陳憲章號如隱居士會稽人善畫梅與牧之齊名評者以二家雖格意不同憲章筆力實過牧之子英作梅

張緒字廷端海虞人

屈處誠東吳人

右二人與仲昭同時工竹石亞於仲昭

毛良字舜臣號兩山居士爵襲南寧伯北平人寫山水師米元章雲霞出沒有天然之妙真賞鑒家尤工詩著無聲詩曲盡畫法之奧與詩集並行於世

太監陳喜字仲樂韃靼人工人物鳥獸下筆無痕爲一代之妙

石銳字以明錢唐人畫得鄭子昭金碧山水界畫樓臺及人物皆傅色鮮明溫潤名著於時

丁玉川江右人工人物山水

林良字以善廣東人歷陞錦衣指揮著色花果翎毛極精巧其放筆作水墨禽鳥樹木皆遒勁如草書人皆不及

顧宗字學淵五羊人任中書舍人畫學黃子久

姜立綱字廷憲號東谿永嘉人能文善書字畫楷正人得片紙爭以爲法畫學黃子久亦妙

黃璨字蘊齋柳楷字文範號萬竹山人俱永嘉人與廷憲官直內閣詩文書畫并皆佳妙

范暹字起東號葦齋東吳人蔣廷暉先生之壻工書法設帳授徒多所造就工於花竹翎毛人多尙之葉

文莊公嘗謂起東善花鳥有談論館閣名公多重之老於京師人稱范葦齋先生云

陳復字啓陽號坦坦居士燕山人幼同弟後從伯父任南京通政司右通政因與詩人文士交稔是以才

思充溢詩文清奇尤長作畫山水松竹皆有矩度亦精寫照由儒士任鴻臚序班理禮部鑄印局事用

薦改國子典籍

陳後字啓先號寓齋復弟也詩文書畫與兄齊名尤精堪輿之學用薦任欽天監博士子漢繼其業焉

劉志壽字伯齡密縣人聰穎能詩以世業任南京欽天監五官靈臺郎喜寫翎毛尤長蝦蟹落筆瀟灑活

動可愛

李景字光遠號柯耕衢之西安人工楷書授禮部司務善寫松竹有過庭章張廷端之筆意

杜堇字懼男有棹居古狂青霞亭之號鎮江丹徒人有籍於京師勤學經史及諸子集錄雖稗官小說罔

不涉獵舉進士不第遂絕意進取爲文奇古詩精確通六書善繪事其山水人物草木鳥獸無不臻妙

由其胸中高古自然神采活動宜乎宗之者衆

沈周字啓南號石田姑蘇人博學有奇思爲詩清新皆不經人道語字亦古拙學黃大癡法其善處略其

不善處。遂自名家。因求畫者衆。一手不能盡答。令子弟模寫以塞之。是以眞筆少焉。

陶成字孟學。號雲湖山人。寶應人。以宦家子。中應天府鄉試。以試以事。不果會試。天性落魄。然多才藝。書工篆隸眞草。詩文奇古。畫山水多用青綠。尤喜作鈎勒竹。兔與鶴鹿皆妙。由其胸中洒然也。

蔣子成江東人。工道釋神像。

阮福。海北人。道釋神像。亞於子成。

趙丹林。善作龍角鳳尾金錯刀竹。

過庭章。無錫人。妙於寫松。

林廣。廣陵人。山水人物。學李在。得瀟洒活動之趣。

楊塤。字景和。善以彩色漆作屏風器物。極其精巧。皆以泥金題詩於上。由其能書畫也。

沈政。字以政。閩人。官至順天府丞。直仁智殿。工花竹翎毛。

徐柱。字夢節。東吳人。善寫葡萄。

伍概。字庭節。臨川人。工書。寄祿中書科。善花竹翎毛。

倪端。善工山水人物。

李福智。釋道人物。可繼上官伯達。

周全。工畫馬。

朱應祥。字岐鳳。號玉華外史。松江人。鄉貢進士。其志高尚。草書與東海南山並爲時重。寫竹尤奇。

俞泰字國昌號正齋無錫人宏治壬戌仕戶科都給事中寫山水絕類黃子久王叔明爲人溫雅詩文書畫皆似之

王田字舜耕山東濟南人以縣佐請老歸田村居喜爲樂府詞膾炙人口遠近傳播山水學高房山不失矩度與名達按與字當係衍文

何澄號竹鶴老人毘陵人善山水官至太守

道士彭元中沈明遠張復陽浙人畫法俱相似

張輦太倉人工山水

汪質字孟文金陵人工山水

許尙文金陵人工山水

盛行之江東人善畫梅花筆力蒼老萱葵竹菊形類草書

史廷直號癡翁復姓名爲徐端本江東名士性犖犖不羈以詩酒爲樂畫山水得行雲流水之趣

陳大章字明之號月隴鳳陽盱眙人由進士官至太僕少卿畫菊有雲湖之妙有詩名尤工行草

吳偉字士英更字次翁號小仙江夏人行取來京授錦衣百戶性自是不受羈絆放歸作山水落筆健壯

白描尤佳觀者自然起興同藝不及

呂紀字廷振四明人爲人謹厚山水人物俱工獨以翎毛得名其設色鮮麗生意藹然爲畫流所宗官至錦衣指揮

鍾欽禮號南越山人。又號一塵不到處。善畫山水。

劉俊字廷偉。山水人物俱能。

袁璘字廷器。山水人物俱善。

張倫字秉彝。人物專科。尤善寫鬼判。

虞公諱謙號玉雪齋。京口人。永樂中官居都憲。詩文政事爲羣公推讓。公餘寫金錯刀竹。多自題詩於上。同里王性善精醫。與公交厚。善寫山水。同時有郭將軍能詩工畫。公贈詩有詩律清新畫入神之句。其重之如此。

楊瑗當塗人。爲儒學教諭。善畫。有生意。

程南雲號清軒。大儒之後。字備篆隸楷草。詩文奇古。官至太常寺卿。喜作雪梅雪竹。極妙。

朱孔易華亭人。與清軒同官。寫東里少師歸田圖。評者謂其作家士氣。皆具。亦今之罕有者也。

黃蒙字養正。永嘉人。官至禮部郎中。及其子采。相繼以書法直內閣。俱擅詩文。山水得黃子久佳處。

蘇致中西蜀人。由科第官署。山水師郭熙而清雅。高出畫流。

葉澄字原靜。其先吳人。作畫學戴文進。得其妙。

周臣字舜臣。東吳人。山水人物俱清致。能詩。

唐寅字子畏。東吳人。中應天府鄉試第一。才藝宏博。作畫有古人之妙。人罕及之。圖書南京解元。文徵明姑蘇人。寫竹得夏景之妙。山水出沈周之右。工詩文。精書法。吳越間稱之。



王彥字存拙。沔陽人。善作梅花。

孔福禧。先聖之裔。工山水。

孫天佑。安國公之孫。翎毛蘭竹。清致可愛。

張欽。字士敬。祥符人。號震齋。善山水花竹。得古人之風。官至都閫。寧陽恭靖王懋之長子。

姜濟。浮梁人。寓蜀。寫山水無墨痕。有雲烟出沒之奇。

僧照菴。浙人。竹石學倪雲林。

僧曉菴。東吳人。善畫葡萄。

僧日章。蜀成都人。山水學唐子華。

僧草菴。住嘉禾三塔寺。工詩畫。

王世昌。號歷山。山東人。工山水人物。

王孟仁。以字行。金陵人。小景山水人物。

朱銓。字文衡。號樗仙。長沙人。工山水人物。鈎勒竹及菊兔。亦能詩。

朱鑑。字文藻。號墨壺。樗仙之弟也。山水人物清奇。

姜隱。字周佐。山東黃縣人。善人物仕女花果。細潤工緻。得古人之妙。

杜君澤。號小癡。姑蘇人。善楷書。工山水。嗜酒。流寓高郵。落魄不羈。以酒卒。

馬稷。字舜舉。號醉狂。江東人。善山水人物。花木竹石。

李著字潛夫金陵人。工山水人物。花木翎毛。

蔣三崧金陵人。善畫山水。

朱端字克正。欽賜一樵圖書。人物山水學盛子昭。墨竹師夏晁。善花木翎毛。

高松字守之。號南崖子。又號我山。文安人。其心甘守家貧。有官不仕。愛攻詩畫。馳譽多能。善書大字兼真草隸篆。能繪小景。并梅菊蘭松之如勾勒竹葡萄甚佳。更有灰堆山墨竹尤長也。

張平山者。名路。字天馳。大梁人也。以庠生遊太學。然竟不仕。獨游情繪事。其人物似吳偉。而山水尤有戴文進風致。一時縉紳咸嘉尚之。得其真迹者。如琪璧焉。名達按高松張平山二傳。汲古閣本版缺。而苗本有之。茲據以錄。

續補

五代名達按。涵芬樓藏汲古閣本。僅存續補五代四字。下文闕佚。茲全據苗本抄補。

錢佖。吳越文穆王傳瓘之養子。官至秀州刺史。精於畫藝。

宋

李交。汀州人。工畫猫。

任源。字道源。宣和間架間。紹興中復舊官。善人物山水。枯木怪石。又作小景。高宗愛之。御題其上。號真常子。

處士朱象先。嘉泰間人。號西湖隱士。作人物山水。橫塘野景。以畫易酒。日在醉鄉。  
蘇晉卿。漢臣子。工佛像。

徐明乃。改之之子。畫山水。似其父。

金

楊邦基。字德茂。號息軒。大定中進士。畫人物兼馬。尤善山水。師李成。官至祕書監禮部尙書。



# 題重刊圖繪寶鑑後

乾坤奠位。聖人應世而興。爻象分輝。龍馬負圖而出。清濁既含。畫意淡濃。自顯文章。古往紛然。今來亦爾。粵吾觀吳興文彥甫氏圖繪寶鑑之所萃者。多方秀氣。歷代清才。或御筆以通神。或仙機而運化。但取雲林雪景。豈拘緇服黃冠。或稱山水人物之奇。或著花竹禽魚之美。或遣詩壇之逸興。或抒官舍之閒情。文武兼收。君臣並列。初題前序。妍媸已別。其區續綴後遺。蒐選未臻其極。今我朝大錦衣苗公字益之號巽齋者。貴膺金玉。雅愛丹青。積集宋唐。辯明真贋。惜茲殘編。敗缺嘗懷三豕之疑。想彼舊版。湮微永寢諸坊之售。由是樂捐常俸。禮致能書。考正魯魚。刻添麟鳳。倘經一覽。實勝千聞。與夏氏共播芳聲。資士林誰云小補。正德己卯季夏望日。賜宗師沙門虎林宗林志。





## 後記

圖繪寶鑑元刻本傳世甚少。涵芬樓藏兩明本。一爲正德己卯苗增刻。一爲汲古閣毛晉刻。以相比校。優劣互見。而皆不能無誤。苗本爲有續編之始。毛本亦有續編。可見毛本實出於苗本。其文字之有異同。蓋毛氏曾加校訂之功也。然苗本墨蹟模糊。缺文疊見。顯非初印。而文意不明。又較毛本爲甚。故此大翻印。參用兩本。間入己見。文字依據毛本。而隨文注明苗本異文於下。此缺彼備。彼無此有。皆擷取備者。以成完璧。蓋各有所長。不容偏取也。次序則補遺依苗本。列於卷五之後。續編之前。續補不依苗本。列於序目之間。亦不依毛本接於補遺之後。蓋前五卷與補遺係夏文彥原編。續編與續補係韓昂續撰也。名目則韓昂續編。兩本皆列爲卷第六。今正其名爲續編。蓋前五卷爲夏文彥原書。不容接續爲編。毫無分別也。至於文義不明。兩本皆誤。一時無別本可校。間爲是正。一二終不能毫無遺憾云。中華民國十八年九月十九日。姚名達識於涵芬樓。